

LUKUMU YA BANA YA KIMPEVE



Matondo na nge, Mpangi Neville. Mbote, bankundi. Mu ke na kiese mingi na kuvwanda awa na suka yayi, mpe samu na nkotolo yayi ya pasteur. Yina vwandaka mbote mingi. Oh, beno zaba, na kuzonzilaka na bampunda, beno zaba, na kutulaka bakime na zulu ya bawu, bawu zabaka ti kisalu vwandaka kwiza. Mbote, ya kele, mu kele kaka na kyese ti Mfumu ke salaka beto mpunda ya kisalu, samu ti beto sala, dyaka. Na yina, beto me vwandaka ata fioti ve, ya kulemba mingi samu na kusala kima mosi samu na Mfumu, kana ya ke kubwa mingi ya beto na kusala yawu. Ata ti, mu me lemba mingi bubu yayi. Mu vwandaka kaka na ntangu mosi ya mpasi, na mwa bilumbu fioti me luta.

² Samu na kukwenda na Californie, mu zolaka kwenda na nzila ya kiti ya ditoma. Mpe, mu ke tuba na beno, kutuba samu na yina me tala bakuningana-ningana! Nzila nyonso kuna, bangunga makumi tanu na tatu samu na kukuma kuna, mpe mu kumaka kuna na ngunga ya zole na suka. Na tanu, mu zolaka telama mpe kukwenda mpe kulonga lukutakanu ya ladyo. Na yina, Bantu ya Mumbungu ya Baklisto, mu zolaka longa dyaka samu na kuvukana ya bawu ya bayinsi nyonso. Mpe kuna na manima ya midi yango, mu longaka na tabernacle mosi ya nene ya ba-Baptiste, mpe kuna . . . na nkokila yina. Mpe na manima landilaka kaka, na kuzonzaka bangunga nyonso, tii na nsuka beto sukaka na Kilumbu ya ntete na nkokila na Tempelo Angelus. Mpe na manima mu bakaka train na ngunga ya kumi na mosi, mpe mu salaka bangunga makumi sambanu na yiya samu na kukwenda na yinzo. Na yawu beno lenda banza, kukota, kilumbu na ntuala ya mazono, mpe kaka . . .

³ Mpe, mazono, kento ya munu vwandaka me kotisa makumi tanu na mosi ya bantu ya ngitukulu, samu na kwiza kusambila samu na bantu. Mazono na suka, kaka, beno me mona, makumi tanu na mosi ya bantu ya ngitukulu. Na yina, bawu nionso vwandaka ve awa. Bawu vwandaka—bawu vwandaka lubokilu ya yinsi, kwi kaka, “Beni zola, beno lenda kwiza na Floride? Beni lenda kwiza awa? Yayi kele Louisville.” Bawu . . . Wapi mutindu beno ke baka, na kati ya bawu makumi tanu na tatu ntangu yayi, kaka samu na suka mosi? Na yina, beno lenda banza.

⁴ Na yawu, mazono na manima ya midi, mu kwizaka mona, na kati-kati ya bankundi ya beto ya luzolo, kaka yina kimbevo ya dyabulu kele. Ntwenya mosi ya bakala yina mu zabaka bamvula me luta, vwandaka na mavimpi ya mbote, na matalana ya bakala mosi ya ntwenya ya athlète. Mpe yandi kele ntangu yayi samu na nsungi ya munu, mpe yandi ke luta bamvula makumi yivwa. Mpe

yandi kele ya kulala, ke na kufwa na Henryville. Nkundi mosi ya mpangi ya mbote ya bakala awa, Mpangi Neville, vwandaka Kermit Spurgeon; tata ya yandi, mulongi ya Nsangu ya mbote, mpe mulongisi ya lukolo, mpe muntu ya nene ya mbote.

⁵ Mu kwendaka na yinzo na manima Mpangi Neville tubaka na munu ti mwana-bakala yango vwanda kufwa, mpe beto vwandaka na bweso ya nene ya kutwadisa yandi na Mfumu Yesu, mazono, samu na mpulusu ya moyo ya yandi. Mpe kento ya yandi mpe munu me wisana kintwadi mpe me sambila ya kieleka samu na yandi, na manima cancer me kudya yandi; ya bakilo makumi yivwa na ndambu, tii na, mu ke tula ntembe ti yandi vwandaka na bakilo makumi zole na sambwadi. Na yawu, beto ke kwikila mpe ke tatamana, ti Nzambi ke belusa yandi. Ti, beto zaba ve yina ke salama. Kasi, kima mosi beto zaba, ti yandi me luta lufwa na Luzingu. Mpe mu ke banza yina tata ya yandi ya kiboba ya mpofo banzaka ntangu nsangu yina kwisaka na yandi, na manima ya bamvula nyonso ya kusambila samu na yandi, mpe na manima ya nyonso. “Nata mwana na nzila yina yandi zolaka kwenda,” beno me mona. Mpe mu zaba ti yandi vwandaka na mbandu ya mbote na ntuala ya yandi.

⁶ Na kukwendaka kuna, na New Albany, na Mama Slaughter yina zingaka awa, mpe badokotolo pesaka yandi tii na ngunga ya sambanu, samu na kuzinga. Na yina, ya vwandaka diambu ya nene, ya ngitukulu, na kuvingilaka. Mpe bisika ya kuswaswana.

⁷ Ntwenya mosi ya bakala vwanda zinga na kielo yina vwandaka landa na munu kuna, yandi vwanda tambula kaka, mwana ya bakala ya mbote, na kusalaka samu na Bell Telephone Company, pene ya bamvula makumi zole na kima mosi. Yandi kuzwaka. . . Tata ya bana tatu to yiya ya fyoti. Mwana ya yandi ya kento ya ntwenya kubwaka kilumbu yankaka yina mpe bukanaka diboko ya yandi. Yandi bandaka na kuwa nsatu ya nganzianzia na kati ya diboko ya yandi; ya kangaka yandi. Bawu zaba ve yinki ke tambula mbote ve na yandi. Yandi kele ya kulala kuna, mpe yandi yayi.

⁸ Kaka kima mosi na manima yankaka, mpe kimbevo na diboko nionso. Mu ke na kiese ti ya ke na nzila mosi kuna. Mu kele na kyese mingi ti beto fwana vwanda ve awa ntangu nyonso, mpe, beno ve? Yinki beto zolaka sala kana mu zolaka zinga na yinzo yayi ya kubela ntangu nyonso? Mu kele na kyese ti ya kele na kyelo ya kuzibuka. Mpe ya kele nyonso yina ntoto kele, ya kele kaka yinzo ya kubela. Ya kele. . . Kaka na ntangu beno ke banza ti beto ke tambula mbote, na yina awa ke kwiza kima yankaka, mpe, dyaka, awa ke kwiza kima yankaka. Kasi, mu kele na kyese ti ya kele na nzila na ngaanda; na kyese mingi ti Mfumu Yesu me kwiza mpe me sala nzila samu na beto, nzila ya kukimina.

⁹ Na yawu, na suka yayi, Mpangi ya munu ya luzolo ya kento Cox vwandaka tuba na munu ti muntu mosi vwandaka kwiza,

mutindu beto lombaka bantu ya kizunga na kukwisa ti ba sambila samu na bawu, mpe mu banza lendaka ve kubikana mwa minuti fioti. Mpe kuna mu banza ti mu ke sambila samu na bawu ntete mu kuzwa lukutakanu, mpe, kuna, kana bawu zolaka vutuka.

¹⁰ Mpe mu banzaka, na yina, samu na bayina nionso zolaka kubikana, mu ke sala nsangu ya munu nkufi, na suka yayi, laka ya munu me kangama, mpe—mpe mu ke kwenda mbala mosi na lukutakanu yankaka ntangu yayi. Mpe na yina mu. . . Mpe lukutakanu ya Chicago ke banda na Kilumbu ya sambanu yina ke landa.

¹¹ Mpe, kuna, mu banza ti ngunga yango me kuma ti kitini yayi ya yinsi fwana kuzwa kutala ya nene, na nkwezulu ya mpangi ya beto ya bakala ya lukumu, Billy Graham, na Louisville, sabala yayi ke kwisa. Yandi ke banda ntangu mosi, na Louisville, mu ke banda na Chicago. Na yawu, mu ke vutuka, ata ti, mu—mu zola kukutana na yandi, na mutindu ya munu mosi, na ntangu yandi kele awa. Mpe bankundi yankaka ke talisa munu na yandi. Mpe mu vwandaka kaka na mbanza mosi, na bayinsi ya nzenza, mpe bisika mingi ya kuswaswana, kasi kaka, na yina, beto zolaka kutana ve mosi na yankaka.

¹² Mpe mu—mu ke lomba na mutindu ya kieleka dibuundu yayi, mpe kimvuka yayi ya bantu me vukana awa na suka yayi, samu na kubaka lukutakanu yayi na zulu ya ntima ya bawu, kuna na Louisville.

¹³ Mu zola kutuba yayi, kaka na nzila. Beno zaba ti makumi nana na sambwadi na zulu ya nkama ya malafu nyonso ke katukaka na Louisville, na Kentucky, ya kele—ya kele na kunwaka na Etats-Unis? Makumi nana na sambwadi. Beno zaba, pene ya makumi yivwa na zulu ya nkama ya tabaka mpe nyonso yina ke basika na Louisville, na Kentucky? Beno zaba ti ya kele kiti ya Satana. Kieleka ya kele. Kieleka ya kele.

¹⁴ Mosi ya bisika ya kulutula mpasi yina kele na yinza, yayi kele awa, kubuka samu na Mfumu Yesu Klisto. Bantu yikwa kwendaka kuna na masa ya meso, samu na kumeka kubuka yinsi yayi, Bambanza yayi ya ba-Chute, samu na Mfumu Yesu! Beno tala, Erickson, bayina nionso basikaka, mpe na kudilaka, wapi mutindu bawu vwandaka meka mpe kumeka mpe kumeka. John Sproul mpe kotaka na kidi-kidi, kuna na Glory Barn, na kumekaka na ngolo nionso na kubuka kima yango samu na Mfumu Yesu. Mutindu bayankaka telamaka na estrade, na nzila ya Bambanza yayi ya ba-Chute, mpe mekaka, mpe lendaka ve kubuka yawu samu na Mfumu Yesu.

¹⁵ Ntangu yayi, mu banza ti Billy Graham kele mosi ya bantu ya kulutula mbote yina me zabana na yinza bubu yayi, na kati ya musambidi, na dibanza ya munu. Kieleka, beto kele na ba-èveque mpe ba-archibishop. Kasi, na dibanza ya munu, yandi

kele mulongi ya Nsangu ya mbote, muntu ya Nzambi. Mpe na yawu—mpe na yawu mu banza ti yandi . . . Mutindu binwani ya Baklisto, kintwadi, beto vukana mpe bantima kintwadi, mpe beto sambila samu na lukutakanu yina, mutindu beto me salaka ntete ve na ntuala. Mpe beno yufula ti Nzambi ke sala yawu, na mutindu nionso to yankaka, pesa beto mioyo, mpe kubuka kiti ya Satana, ti bawu ke kanga banganda nionso ya malafu mpe bawu yoka ba-usine ya tabaka, mpe kufulusa mabuundu mpe kuzwa kutiamuka ya kieleka ya ntama ya Mpeve-Santu. Mfumu kusakumuka!

¹⁶ Ntangu yayi, mu kele na kima kaka mutindu yankaka, fyoti ya mumesanu ve samu na mbandukulu. Mpangi ya munu ya bakala kele na mwana ya fyoti awa yina bawu zola kubyeka na Mfumu. Mpe mu banza ti beto ke sala yawu kaka ntete beto sambila samu na bambevo, kana Nzambi kuzola. Mpe kana Mpangi-kento Gertie ke kwiza na piano. Mpe bayina nyonso kele na mwa ba-bébé . . .

¹⁷ Ntangu yayi, na kati ya Biblia, ba me longa beto awa ti . . . Ntangu yayi, bantu mingi—mingi, bantu mingi, ke botikaka bawu, ke mwangisa mwa maza na zulu ya bawu, ke bokilaka yawu “mbotika ya bana”. Mbote, ntangu yayi, ya kele nyonso ya kulunga. Yinga. Beno nyongisa ve bebé, mpe mu kele—mu ke kwikila ti ya ke vwanda nyonso ya kulunga. Mpe, bayankaka, bawu kele na mitindu yankaka yina bawu ke salaka yawu. Mpe, kasi, beto ntangu nyonso ke zolaka, kaka pene-pene mutindu beto lenda, na kubikana na mutindu ya Biblia ya kusalaka yawu. Mpe, mutindu ya Biblia ya kusala yawu, ata kisika na kati ya Biblia kisika bawu salaka, na ba-bébé. Vwandaka . . .

Mbote, ntangu yayi, ntangu Ngwisani ya Ntama, bawu kuzwaka nzengolo.

¹⁸ Mu ke kukiyufula kana mwa bakuluntu lendaka tula fioti na lweka mpangi-kento awa, kana beno zola, tii beto ke kuzwa mbiekolo; mpangi-kento yina kele na zulu ya kipoyi awa. Mpe, na yina, beno ke banza ve, mpangi-kento ya luzolo? Ya kele kaka mwa ntangu fyoti. Mpe beto . . .

¹⁹ Mpe na yawu kuna, na Ngwisani ya Ntama, bawu—bawu kuzwaka nzengolo na bebé. Mpe na . . . Bawu kuzwaka nzengolo ya bebé.

²⁰ Mpe na Ngwisani ya Malu-malu, mutindu kaka bawu salaka yawu, bawu nataka bana ya fyoti na Mfumu Yesu, mpe Yandi zangulaka bawu na maboko ya Yandi, mpe sakumunaka bawu. Mpe yandi tubaka, “Beni bika bana ya fyoti kukwiza na Munu, mpe beno yimina bawu ve, samu ti ya kele Kimfumu.”

²¹ Ntangu yayi kana ya kele na mama yankaka awa, yina kele na mwa bebé ya bawu, yina ba ke zolaka kusakumuna na Mfumu, beto ke vwanda na kiese na kusala yawu na ntangu yayi. Mpe ntangu yayi bika beto . . . na bukebi nionso.

22 Ntangu yayi, yinki kele nkumbu ya mwana yayi? [Mpangi-bakala me tuba, "Robert Lynn."—Mu.] Mwana-bakala mosi ya fioti, Robert Lynn. Ntangu yayi, ya kele mbote mingi. Ntangu yayi, yayi kele... Mu banza ti beno—beno me pesa lukumu na bébé yango...?...

23 Yayi ke lakisa ntima ya mama samu na mwana ya yandi. Mpe na kubanzaka na yayi, samu na bayina me kuzwaka ata mwana mosi ve, kasi zolaka kusansa mwana mosi, bawu vwandaka kupesa lukumu na mwana mosi. Benó me bakula ti beto nionso kele bana yina me kuzwa lukumu? Nzambi zolaka beto mingi, ti Yandi pesaka beto lukumu na nzila ya Mwana ya Yandi, Klisto Yesu. Mpe beto nionso kele bana yina me kuzwa lukumu. Mpe, beno bambuka moyo, mutindu tata yayi mpe mama ke banzaka na mwana yayi ya fioti yina vwandaka ve na yinzo ya kukwenda, bawu pesaka yandi yinzo mosi, samu na kusansa yandi mpe samu na kudisa yandi. Beto vwandaka ve na yinzo ya kukwenda, mpe Nzambi pesaka beto mosi.

24 Ya kele mwana yina ba me pesa lukumu. Nkumbu ya yandi kele Robert Lynn Branham; bébé mosi ya kitoko mingi, mwa bébé ya fioti.

Ntangu yayi beto ke kulumusa yintu ya beto.

25 Tata ya beto ya Mazulu ya ntalu, mutindu na bilumbu me luta, batata yikwa mpe bamama me telemisa bana ya bawu ya fioti na maboko ya Nge! Mpe Nge tubaka, "Benó bika bana ya fyoti kukwiza na Munu, mpe beno pekisa bawu ve, samu ti yayi kele mutindu Kimfumu ya Mazulu." Mpe mwana yayi ya fioti vwandaka na yinzo mosi ve, ba pesaka yandi yinzo mosi, mpe Nge me tula na kati ya ntima ya bawu zola samu na bébé yayi.

26 Mpe, Tata, beto ke sambila ti Nge ke sakumuna mama yayi mpe tata, mutindu bawu ke telemisa mwana. Mpe bika ti ba sansa yawu na yinzo ya kisambu, mpe ba longa yawu na kukwenda na yinzo-Nzambi, mpe kuzinga samu na Mfumu Yesu. Sakumuna yawu, Tata ya Mazulu ya luzolo.

27 Mpe, ntangu yayi, kana Nge vwandaka awa na zulu ya ntoto, na nzutu ya nsuni mutindu beto ke telama na suka yayi, ba ke pesa bébé na diboko ya Nge. Kasi Nge me kwenda na Mazulu mpe me tuma beto na kulandila ministele tii Nge ke vutuka. Mpe, Tata, mutindu mpangi ya munu mosi ya bakala ke tulaka bébé na maboko ya munu, mu ke pesa yawu na Nge na Nkumbu ya Klisto. Sakumuna mwana yayi mpe bika yandi zinga mpe yandi vwanda na mavimpi ya mbote mpe na ngolo, mpe yandi kukula samu na kuvwanda kisadi ya Nge. Sakumuna tata mpe mama, na yinzo. Beto ke pesa yawu na Nge, na Nkumbu ya Mfumu Yesu Klisto. Amen.

28 Nzambi sakumuna nge, Agnes, ti nge ke vwanda mama ya kieleka; mpe nge, Jessé, tata ya kieleka samu na bébé yayi. Mpe

bika ti Nzambi sakumuna beno na bangolo ya beno. Mpe Nzambi kuvwanda na beno.

²⁹ Wapi faso! Yinki kele nkumbu ya bébé? [Mpangi-kento me tuba, “Robert Darrel.”—Mu.] Yankaka Robert. Mbote, ya kele mbote. Robert Darrel.

³⁰ Mpe yinki kele nkumbu ya nge? [Mpangi-kento me tuba, “Robertson.”—Mu.] Nge kele junior. [“Yinga.”] Mpe nkumbu ya nge ya nsuka? [“McCloud.”] McCloud. [Kisika ya mpamba na bande.]

Na kunataka bambuma, na kunataka
bambuma,
Oh, beto ke kwiza na kuyangalala, na kunataka
bambuma.

Kukuna na suka, kukuna na ntangu ya nkokila,
Kukuna na kati-kati ya midi mpe na madidi ya
nkokila;

Malembe-malembe na kubukaka bambuma,
na manima ya ntangu ya kuyonzika,
Beto ke kwiza na kuyangalala, na kunataka
bambuma.

³¹ Mbote, ya kele mbote. Na kunataka bambuma, ya kele yina batata mpe bamama ke salaka: kunata bawu na Mfumu Yesu.

³² Mpangi-kento yina kele ya kulala na zulu ya kipoyi, ke talana mutindu yandi kele ya kulutula yimbi ya bantu nyonso, landila mutindu beto lenda mona. Yandi kele na kati ya kipoyi. Mpe beto ke . . . Kana ya kele na muntu . . . Yandi zola kuvingila kaka baminuti fyoti, samu na kuwa Nsangu, ntete ba sambila samu na yandi. Mpe mu banza ti ya kele kieleka, kieleka mbote. Kana ya kele na muntu awa yina lenda ve kuvingila, mpe zola kubika, mpe kana beno zola ti ba sambila samu na yandi ntangu yayi, beto ke vwanda na kiese na kusala yawu, kana beno zola kaka kutelemisa diboko ya beno. Kana ve, beto ke kuzwa lukutakanu ya kubeluka ya nzutu mbala mosi na manima ya . . . nsangu ya nkufi; beno meka kaka na ntangu yina na kalasi ya lukolo ya Lumingu. Mbote mingi. Na yina beto ke tanga Masonuku mpe ke kuzwa Nsangu mpe, na nswalu, mpe na manima kubaka ntangu ya beto na ndonga ya bisambu.

³³ Mpe ntangu yayi, ntete beto banda, mu zola beno, nyonso yina kele mbote na suka yayi, samu na kubambuka moyo na bayina kele ya kubela, samu beto fwana sambila mosi samu na yankaka.

³⁴ Mpe mu vwandaka na kiese mingi ntangu mu kumaka na Californie kilumbu yina, mpe ba vwandaka kota na ba-tabernacle yina kisika ba vwandaka meka na kubasika yawu. Mpe kuna na kisika Clifton ba vwandaka ya kutelama pene-pene na kizunga ya bayinzo, kuna na bala-bala, na kuzolaka kaka kupesa kimbangi. Mpe yandi tubaka, “Mpangi Branham,

mu vwandaka na cancer. Nge sambilaka samu na munu. Mu—mu vwandaka mpofo. Mu vwandaka *yayi*.”

³⁵ Mpe mutindu kukulumuka bala-bala, mpe nsatu ya mutindu yina! Mu banzaka, “Nzambi, yinki ya ke vwanda ntangu beto ke sabuka mpe ke kwiza na lweka yankaka? Bawu yina, me vukana pene-pene ya makumi ya mafunda, me telema kuna.” Mpe wapi kima ya kuyituka ya ke vwanda na ntangu yina! Na yina, na yina, mwa bangolo ya beto ya kulemba ke zola kutuba mingi ve. Ntangu yayi beno ke kwenda tii kuna, ya ke monana ti, beno lendaka diaka ve kukwenda ntama, mpe beto ke kuma kaka ya kulemba mingi mpe ya kubaluka.

³⁶ Mpe kuna Satana ke kwiza, ke tuba, “Yinki kele mfunu ya yawu? Samu na yinki nge ke na kusalaka yawu?” Oh!

³⁷ Kasi na yina beno ke banza na bima ya mutindu yina, ya ke soba yawu, na mutindu nionso. Yina ke sala . . . Ya ke sala bima ya luswaswanu.

³⁸ Ntangu yayi, ntete beto belama na Ndinga, beto ke sambila dyaka kaka mwa ntangu fyoti.

³⁹ Tata ya beto ya Mazulu, ya kele na bantima yina ke vutula matondo yina beto ke kwiza na Nge. Ya kieleka, Mfumu, Nge zaba bikalulu nionso ya muntu. Mpe mutindu yandi kele ya kulemba mpe pete-pete, mpe mutindu yandi kele kukondwa ngolo. Mpe lemvokila mutindu kisadi ya Nge, muntu kele, kasi, Mfumu, Nge na lemvo ya Nge me bokila beto na kuvwanda kisadi ya Nge. Mpe beto zaba, na suka yayi, kukondwa kulunga ya beto, mpe beto ke lombi ti Nge ke ndima beto, Tata, bubu yayi, mpe ke pakula na Mpeve-Santu, mpe tuba na beto Bandinga ya kikesa yina Nge me tuba na Ndinga ya Nge ya Santu awa. Mpe beto ke sambila ti Mpeve-Santu kunata konso Ndinga mbala mosi na ntima, kaka kisika wapi ya fwana vwanda, mpe kuna ti yawu kukota mpe kukula na kyese ya nene, bayinti ya mpulusu. Pesa yawu, Tata.

⁴⁰ Belusa bambevo mpe bantu ya kele na nsatu. Beto zaba ti bawu kele ya kuvwanda awa. Mpe bantu mingi me katuka na bakilometele mingi, mpe me kulala na kati ya ba-hotel mpe nionso, na kuingilaka bweso ti ba sambidila bawu. Beto kele na kyese mingi samu na bweso yayi ya nene, Mfumu, na kuzaba ti Nge kele awa samu na kubelusa bambevo.

⁴¹ Nzambi, mosi ya bambevo yina beto zaba, kele bakala ya kubela mpe kento. Mu ke sambila, Tata ya Mazulu, ti kilumbu yayi, ti Nge zola, na mutindu ya luswaswanu, kupakula, bubu yayi, mpe vulusa bayina me zimbana. Bakala nionso ya kuzimbana mpe kento, ti bawu kwiza na lembani na ntwala ya kimfumu ya lemvo mpe kuzwa mpulusu, samu beto me lombi yawu na Nkumbu ya Klisto. Amen.

⁴² Ntangu yayi bika ti Mfumu kubwela balusakumunu ya Yandi na ntangulu ya Ndinga ya Yandi, na yina beto ke kota na

Yawu. Mu ke vwandaka ntangu nionso mukwikidi ya nene na kati ya Ndinga. Na yina, awa, mpe bampimpa fyoti me luta, mu vwandaka zonza kisika mosi na zulu ya baprofete yina kwendaka na kupesa profesi. Kasi, Michée...na manima ya bankama yiya ya baprofete pesaka kibaka mosi ya ngolo. Kasi, Josaphat tubaka, “Ya kele dyaka ve na mosi dyaka?” Mosi dyaka, na manima ya nkama yiya me pesa Ndinga? Kasi, Michée vwandaka na Ndinga ya Nzambi. Yandi zabaka ti kima mosi vwandaka tambula mbote ve.

⁴³ Mpe ntangu nyonso yina beto ke kuwa kima na ngaanda ya Ndinga ya Nzambi, beto zaba ti ya kele na kima mosi ke tambula mbote ve. Ya ke wakana kaka mbote ve. Yesu tubaka, “Mameme ya Munu zaba Ndinga ya Munu, mpe nzenza bawu ke landa ve.”

⁴⁴ Mpe matondo na beno, samu na kusambila kuna, samu na reveil ya Tempelo Angelus. Nkokila ya ntete kuna... Ya ke simba kaka bankama makumi tanu na tanu; mafunda tanu, bankama tanu. Bawu kotisaka bantu mafunda sambanu, mpe commissaire ya incendie kangaka bielo, ngunga mosi na ndambu na ntuala mu kuma kuna, na Tempelo Angelus. Mpe yinki mutindu Mfumu ya beto ya luzolo Yesu vulusaka bayina zimbanaka mpe belusaka bambevo! Ya vwandaka mbote mingi. Mpe kilumbu yina landaka...

⁴⁵ Mpe mwa Mpangi ya beto ya kento Hicks, yina vwanda mulongisi ya lukolo ya Lumingu awa, mu kutanaka yandi mpe bana mpe bakala ya yandi. Mpe mu kutanaka na Mpangi Ben Bryant mpe bayina nyonso katukaka na tabernacle yayi, kuna, na wesete, samu—samu na kubundana kuna. Yinki lukutakanu ya kitoko ya vwandaka, samu na kumona bawu nionso diaka!

⁴⁶ Na kapu 17 ya Santu Matthieu, kaka na nzila ya kutanga, na suka yayi. Mu zola kutanga kaka kitini awa samu na dilongi. Mpe bika ti Mfumu kupesa beto dibanza na kati ya Ndinga.

...na manima ya bilumbu sambanu Yesu bakaka Pierre, Jacques, mpe Jean mpangi ya yandi ya bakala, mpe nataka bawu na zulu ya mongo ya yinda,

Mpe sobaka na ntuala ya bawu: mpe kizizi ya yandi vwandaka lezima mutindu mwini, mpe bilele ya yandi kumaka mpembe mutindu nsemo.

Mpe, beno tala, kuna monikaka na yandi Moïse mpe Elie vwandaka solula na yandi.

Na yina vutulaka Pierre, mpe tubaka na Yesu, Mfumu, ya kele mbote samu na beto na kuvwanda awa: ke... bika beto tunga...kana nge zola, beto sadila nge tatu ba-tabernacle tatu; mosi samu na nge, ...mosi samu na Moïse, mpe mosi samu na Elie.

Na yina yandi vwandaka tuba, tala, dituti ya nsemo fikaka bawu: mpe tala ndinga na kati ya dituti, yina

tubaka, Yayi kele Mwana ya munu ya luzolo, na yandi mu me sepela; beno kuwa yandi.

47 Bika ti Mfumu kubwela balusakumunu ya Yandi na ntangulu ya Ndinga ya Yandi.

48 Bantangu yankaka Nzambi ke kutanaka na mutindu ya luswaswanu ya muntu. Nzambi ke zolaka ntangu nionso na kulonga na muntu. Mpe bambala mingi, na Ngwisani ya Ntama, mutindu beto lendaka vutuka na kutala mutindu Nzambi kutanaka na muntu. Mpe ata lutangu ya bawu, Nzambi ke kutana na muntu. Yandi kutanaka kilumbu mosi na bankama tanu. Mpe Yandi kutanaka, diaka, na makumi sambwadi. Yandi kutanaka, diaka, na kumi na zole. Yandi kutanaka mbala mosi na tatu. Mpe na manima Yandi kutanaka, diaka, kaka na mosi. Mpe ata lutangu ya ndongisila, Nzambi ke zolaka ntangu nionso kukutana na muntu.

49 Na yawu, ata ti dibuundu na suka yayi lendaka vwanda nene mingi ve na dibuundu to na ntela, mutindu ba-cathédrale mingi ya nene bubu yayi, kasi Nzambi ke sepela na kukutana na beto. Na yina, Yandi tubaka, “Kisika zole to tatu me vukana na Nkumbu ya Munu, Mu ke vwanda na kati-kati ya bawu. Zole to tatu ke vukana na Nkumbu ya Munu, mu ke vwanda na kati-kati ya yawu zole to tatu.”

50 Mpe kifwanusu yina beto lendaka tula awa bubu yayi, na nzila ya Mpeve-Santu, beto lenda baka bangunga samu na kutimuna masonuku yina, yinga, mu ke tuba basabala. Mpe ba me timuna Yawu, bamvula mingi, mpe, kasi, ndambu me vwandaka ntete ve ya kutanga na masonuku yayi ya kitoko, mpe mu banza ata mbala mosi ve ti ya ke vwanda.

51 Samu ti, Ndinga ya Nzambi kele ve mutindu ndinga ya muntu. Ndinga ya muntu kele na mbangululu mosi, to nzonzolo mpe ntangu ba pesaka yawu, kasi Ndinga ya Nzambi kele na mbangululu ya Kukonda nsuka na nzila ya bansungi mutindu Yawu ke lutaka. Konso nsungi lenda vutukila Ndinga mosi, samu ti Yayi kele nsamunu yina me twadisama na kimpeve, ya Kukonda nsuka, ya mvula na mvula, yina ke bebaka ve yina me katuka na Nzambi. Ya lenda vwanda ti kana Yawu. . . Kana bantumwa tangaka Yawu na kati ya nsungi ya bawu, Ya zolaka kutuba kima mosi samu na bawu; kana Wesley tangaka Yawu na kati ya nsungi ya yandi, mpe Luther na kati ya nsungi ya yandi, mpe Calvin na kati ya nsungi ya yandi. Kasi, bubu yayi, Ya ke lezima mpe ke sema, mpe me sala kaka kisa lu mutindu Yawu salaka samu na bawu na kilumbu ya kieleka yina Yawu tubamaka, samu ti Yawu kele Ndinga ya Nzambi.

52 Bampova ya beto, tuba kaka, “Jean, nge kwiza na yinzo ya munu, mu ke vwanda na kyese na kumona nge.” Yina kele ndinga ya beto, mpe ya zola kaka kutuba, “Jean, kwiza na yinzo ya beto.”

⁵³ Kasi ntangu Nzambi ke tuba, ya kele ya Kukonda nsuka. Ya me pema na mupepe ya ngolo yina ke kufwaka ve, Mvangi ya kukonda nsuka Yandi mosi. Na yina, kuna, ya kele ve na mutindu ya kuzwa ntendulu ya muvimba ya nzonzolo nionso ya Nzambi. Ya kele samu na konso nsungi, mpe konso nsungi.

⁵⁴ Ntangu yayi, na dyambu yayi, na kati ya . . . yina beto kele na yawu na ntuala ya beto na suka yayi, Nzambi vwandaka zonga na bantu tatu.

⁵⁵ Ntangu yayi, *tatu*, ntete, kele lutangu ya kusola ya Nzambi ya “kulunga.” Nzambi soolaka tatu, mpe tatu kele lutangu ya kulunga ya Nzambi. *Sambwadi* kele lutangu ya “kusambila.” *Makumi tanu* kele lutangu ya “jubilé ya Yandi.” *Makumi yiya* kele lutangu ya “mpukumunu.” Mpe tatu kele lutangu ya Yandi yina Yandi soolaka na kumata, kilumbu yayi.

⁵⁶ Ntangu yayi, tatu kele lutangu ya kulunga, ya kele, ti Nzambi kele ya kulunga; yina, ya kieleka, Nzambi ya Kukonda nsuka me kuma ya kulunga na bansungi tatu ya kumonisama ya Bunzambi ya Yandi: Tata, Mwana, Mpeve-Santu. Ya zola kutuba ve ti ya kele na banzambi tatu ya luswaswanu. Kasi, ya kele na Nzambi mosi yina me talisama na kati ya tatu. Nzambi kele tatu ve. Nzambi kele mosi. Kasi, bakumonisama tatu ya Bunzambi ya Yandi, yina zola kutuba, bansungi tatu ya ntangu na zulu ya ntoto kele ya kulunga yina, ya kieleka mpe ya moyo ya Nzambi.

⁵⁷ Yandi monikaka na Abraham na divunda ya tiya, mpe twadisaka bana ya Israël, na Nkumbu ya Nzambi, Tata, yina vwandaka Nsemo yina vwandaka kuna na zulu ya tabernacle, yina twadisaka bawu na nzietelo ya bawu. Nzambi, Tata. Mpe kuna Tata, samu na kuvutula ngwisani na kati-kati ya Nzambi na muntu. . .

⁵⁸ Mutindu mu vwandaka tuba awa mwa ntangu me luta, mu banza, mbala ya nsuka mu vwandaka na tabernacle, na yembe mpe mwana-dimeme. Mutindu ti Nzambi, kaka, . . . Muntu yankaka ve lendaka sala yawu. Nzambi zolaka kwiza na ntoto mpe kusala kisalu Yandi mosi. Mpe ntangu Yandi talisaka Mwana ya Yandi na mutindu ya mwana-dimeme, ya kulutula lembami ya bivangu nionso, mpe Yandi monikisaka Yandi mosi na mutindu ya yembe, bandeke ya lembami nyonso yina ke pumbukaka na zulu. Mpe ya kele samu na yina Yandi salaka yayi, ya kele kulakisa beto ti kaka lembami ke zinga na lembami, kukikulumusa ke zinga na kukikulumusa. Ya fwana vukana.

⁵⁹ Kisadi ya mabaya, to ebeniste mosi, yina zaba yinki zola kutuba kusala mikila, mutindu beto ke bokilaka yawu, kusala ba-rainure, to kusala ba-rainure na ba-languette. Samu na kusala tablo ya muvimba, ya kele kutula ba-rainure na ba-languette. Mpe ntangu bawu ke vukana, ya ke wisana mbote-mbote kintwadi. Na masa na zulu ya yawu, ya ke vimba tii kuna mupepe lendaka ve kuluta na kati ya yawu.

⁶⁰ Mpe ntangu mukwikidi mpe Nzambi...Nzambi kele ya kulunga mingi, ti, na nzila ya kuzenga mpe ke bula na mukwikidi, ntangu bawu ke vukana. Pierre tubaka, “Beno balula ntima, na yina, mpe beno botama na Nkumbu ya Yesu Klisto samu na mulemvo ya masumu ya beno, mpe beno ke kuzwa dikabu ya Mpeve-Santu.” Beno me mona? Ya ke sala bawu ya kulunga mingi!

⁶¹ Kuna ntangu Nzambi kulumukaka na mutindu ya yembe, mpe ke sema na zulu ya Mwana-dimeme mpe vwandaka zinga na kati ya Mwana-dimeme, mpe ba bikaka ata fioti ve Mwana-dimeme, samu ba vwandaka mosi. Yina vwandaka mosi ya ba-adventiste ya kulutila nene yina yinza me kuzwaka ntete ve. Bika ti beto tala yawu na bantangu fioti, mu ke basika na dilongi ya munu, kasi wapi mutindu ti mazulu mpe ntoto me yambana kintwadi. Mutindu ti Nzambi mpe muntu me wisana kintwadi! Wapi mutindu ti ata mpe bivangu yina ke pumbukaka na mazulu, mpe bibulu yina ke tambulaka na bilanga, kumaka mosi, ntangu muntu mpe Nzambi vutulaka ngwisani kintwadi, na nzila ya Muntu, Mfumu Yesu Klisto. Wapi kima ya kitoko!

⁶² Samu na kubikana na Nzambi, kuvwanda na lutondo. Nzambi kele na lutondo. Samu na kubikana na Nzambi, kubikana na zola. Nzambi kele zola. Beno bikana swi. Beno bikana...Ata mbala mosi ve kubikana ya kulunga na beno mosi. Beno tadila ntangu nyonso na Yandi. Beno sadila ata fioti ve mabanza ya beno mosi; beno baka mabanza ya Yandi. Bika mabanza ya Yandi kuvwanda mabanza ya beno. Mpe beno baka Yawu na dibanza ya beno ya nsuni, mpe beno vutukila Yawu. Mpe beno tuba, “O Nzambi, katula bantembe ya munu nionso, mpe bika mabanza ya munu kuvwanda mabanza ya Nge.” Mpe beno bantu ya kubela, beno sala yawu mutindu beto ke na kuzonzaka. Beno kwenda kaka ntama, beno katula dibanza ya kimbevo. Baka mabanza ya Nzambi, bika ti Yawu kuma mabanza ya nge.

⁶³ “Beno banza na bima yayi,” Biblia ke tuba, “kana ya kele na lukumu, kana ya kele na ngolo.”

⁶⁴ Tatu, Nzambi ke na kuzonzaka na bawu. Ntangu yayi, tatu kele nsiamisa. Yandi bakaka na Yandi, Pierre, lukwikilu; Jacques, kivuvu; Jean, zola. “Lukwikilu, kivuvu, mpe luzolo, tatu yayi.” Kana beno lenda vwanda na lukwikilu mpe kivuvu mpe zola, beno kele pene-pene ya Kimfumu ya Mazulu, na yina; bima tatu ya nene. Nzambi bakaka bayina mutindu nsiamisa, samu, “Na yinwa ya bambangi zole to tatu, bika ti konso ndinga kuvwanda.”

⁶⁵ Na yina, diaka, ya vwandaka talisa kisika ya mwana. Na Ngwisani ya Ntama, ntangu mwana mosi butukaka na dibuta mosi, ba pesaka yandi mulongisi samu na kusansa yandi mpe kukeba yandi. Tata vwandaka muntu ya bisalu mingi, na zulu

ya kimfumu ya yandi. Mpe mwa kimfumu nionso ya fioti ba bokilaka yawu yinzo.

⁶⁶ Ya kele mutindu, na Ntinu Jacques mbangululu, na Jean 14, tubaka, “Na yinzo ya Tata ya Munu kele na bisika mingi ya kuvwanda.” Ntangu yayi, ya ke wakana kaka kieleka ve samu na beto bantu ya wesete bayina ke bakaka yinzo mpe yinzo samu na kuvwanda ya kuswaswana. Kasi na bilumbu ya kusonama ya Biblia, yinzo vwandaka na yinzo, samu ti yinzo zolaka kutuba kimfumu.

⁶⁷ Mpe tata yayi vwandaka na bantu kumi na kilanga ya yandi, bisika nionso, kumi na zole ya bawu. Mpe ntangu mwana mosi kubutukaka, yandi vwandaka na muntu yina ba soolaka, ya kulonguka, ya kukikulumusa, muntu yina ba soolaka yina vwandaka mosi ya kimfumu ya yandi, kitini ya kimfumu ya yandi, mulongisi. Kaka mutindu yina tata tulaka na zulu ya mwana ya yandi.

⁶⁸ Mpe mutindu Tata bubu yayi me tula Mulongisi ya mbote na zulu ya bana ya Yandi, beno mpe munu. Yina ba soolaka, yankaka ve na ntima ya kieleka mpe moyo ya Mfumu Yesu, samu na kutelama na kisika ya kitoko ya Nzambi.

⁶⁹ Wapi mutindu mulongisi yayi fwana vwanda ya kusoola! Yandi fwana vwanda muntu ya mayele, muntu yina ba soolaka, muntu ya kufuluka na tata, yina ke longa mwana kaka misiku ya mbote.

⁷⁰ Mpe mutindu Mpeve-Santu, bubu yayi, ntangu Yandi me kwisa, bima nyonso yankaka ke monana na kisika ya zole ntangu Mpeve-Santu me kwiza. Bantu lenda tuba, “Bilumbu ya bimangu me lutaka,” kasi bika muntu yina me butuka mbala ya zole na Mpeve-Santu, mbala mosi, kukwiza na ntwala ya yawu. Samu ti, Yandi ke longaka kaka yina kele kieleka. Yandi ke zonzila kaka na Tata.

⁷¹ Mu ke zola kuvwanda na muntu yina me zaba ve ABC ya yandi, samu na kulonga mwana ya munu, yina vwandaka na Mpeve-Santu, kulutila milongisi nyonso na yinza bayina vwandaka ve na Mpeve-Santu. Samu ti, Yandi ke zonzila na Tata. Beno me mona? Mpe Mpeve-Santu ke zonzila na Tata. Mpe na yina Yandi ke longa mwana, “Kuvwanda ve ya kunatama na konso mupepe ya malongi,” kasi kundima mpe kukwikila misiku yina Tata me tula.

⁷² Ya kele samu na yina kubeluka ya Kinzambi ke kumaka ya kukikulumusa mingi, samu na mukwikidi ya kieleka, samu ba me longa yandi, ya Mpeve-Santu, samu na kukwikila bima nionso. Wapi mutindu beto lendaka tula ntembe na Ndinga ya Mvangi?

⁷³ Wapi mutindu yinza kotaka na luzingu? Wapi kisika Nzambi bakaka kisadilu ya kusala na yawu? Beno me telemaka ntete na kubanza na yawu? Yandi tubaka yawu kaka. Mpe, na manima

ya nyonso, ngidikulu ya kieleka yina kele awa ntangu yayi kele kima yankaka ve kulutila Ndinga ya Nzambi yina me monisama. Beno banza na yawu. Bayinti yina ke yela, kele Ndinga ya Nzambi. Myongo yina ke simba zulu, mpe ke nataka beto, kana beto zola kumona kitoko, kutala na zulu ya mongo. Mpe kulutila beno ke mata na zulu ya mongo, ya kuvedila mpe ya kusyema kulutila ya ke kumaka.

⁷⁴ Mu vwandaka ya kutelama kuna na kati ya kilanga ya galasi ya node ya Colombie-Britannique! Mutindu beno ke mona awa, na kiziba; mwa mingi na zulu fioti, masa ke kumaka bunkete, ya ke blue mingi mpe ya kuvedila mingi, bayinti ke zimbana. Yinza nyonso ke monana na kutuba, "Tala na zulu." Mpe kuna na zulu ya galasi ya nene ya galasi mingi yina kele ya kutsyema mingi ti ya ke sema mutindu mwini, beno ke tala na zulu. Kana beno zola kumona nani ke vwanda mpe bima ya kieleka, mpe bima ya kuvedila, beno tala ntangu nyonso na zulu. Mongo ke lakisa yawu. David tubaka, "Mu ke tala na myongo kisika ke katuka lusalusu ya munu. Lusalusu ya munu me katuka na Mfumu."

⁷⁵ Mulongisi vwandaka talisa ntangu nionso mwana na tata, mpe samu na kukwikila na tata. Mpe, na yina, mulongisi vwandaka kisadisi.

⁷⁶ Na suka yayi, mutindu mu vwandaka tala mwa nkundi ya munu ya luzolo, mpe mu monaka mwana ya munu ya fyoti, ntangu yandi salaka mwa kudasuka ya yandi kuna na mesa, yandi losaka mwa dilonga ya yandi na maki ya yandi mpe nionso, ti mama ya yandi salaka na kwikama mingi samu na kukubikila yandi madia ya suka. Mpe yandi vwanda meka na kulonga yandi na kudya na lutu ya yandi. Mpe yandi vwanda zola kubaka diboko ya yimbi.

⁷⁷ Mbote, samu na munu, mu tubaka, "Bika yandi kuzwa diboko yina." Kasi mama zabaka luswaswanu. Yandi zabaka, kana yandi bika yandi landila mutindu yina, yandi zolaka sadila maboko zole to yandi zolaka sadila kaka diboko ya kimama, mpe yina kele mbote ve. Na yawu, mutindu mulongi ya kieleka, yandi salaka yandi kusoba, ata ti yandi zolaka yawu ve. Kasi, mama zabaka yina vwandaka mbote.

⁷⁸ Mpe ntangu mingi, mulongi ya beto, Mpeve-Santu; beto ke meka na kusala yawu mutindu ya yimbi. Kasi, bantangu yankaka ya ke niongisa beto. Bantangu yankaka beto lendaka vwanda na zulu ya mbeto ya mpasi. Bantangu yankaka dokotolo lendaka tuba ti bivuvu nyonso me kwenda. Kasi, ya kele Mpeve-Santu ke longi beto na kusadila diboko ya kibakala. Yandi zaba yina kele ya kulutila mbote. Yandi zaba mutindu Tata zola yawu. Yandi kele mulongi. Mpe mu banzaka. . .

⁷⁹ Joseph ya ntwenya, yandi zolaka ve kusadila diboko yango, na yina mama bakaka nkawa ya yandi ya kulemba, mwa pene fioti ntangu ya yinda, mpe yandi bulaka yandi kuna na lweka.

Yandi talaka munu. Kasi, dyaka, mu zolaka yandi na ntima ya munu nyonso, zolaka kufwa ya mpamba samu na yandi, kasi mu zabaka ti mama zabaka ya kulutula mbote. Mu tubaka, “Yandi me longusa mwana yango.”

⁸⁰ Beto lendaka ve kusosa kimpangi, mpe kuvwanda na kimpangi na yandi, kulutula mingi. Beto fwana kuwa malongi ya bana na Tata ya beto. Yandi zaba yina kele ya kulutula mbote. Bantangu yankaka beto ke tubaka, ntangu ba ke longaka Nsangu ya mbote, “Oh, mu ke kwenda kaka na dibuundu ya munu, bawu ve. . . Yinga, mu ke kwikila kaka Yawu mutindu *yayi*.” Benó me mona? Kasi, beno bambuka moyo, Mpeve-Santu zaba ya kulutula mbote. Ya zaba mutindu ya kulunga beno. Bantangu yankaka ya ke bula na zulu ya yinti, ya ke sungika beno. [Mpangi Branham me konkota na chaire—Mu.] Benó fwana bambuka moyo, Nzambi salaka Yandi mulongi ya bana samu na Dibundu. Mpe Yandi ke zolaka Tata, mpe Yandi ke talisaka ntangu nionso na Tata.

⁸¹ Mpe, ntangu yayi, ntangu ba vwandaka longusa mwana, yina zolaka tuba ve mwana. . . Mwana kele kieleka mwana ya tata. Kasi kana ya vwandaka mwana yina ke tumamaka ve, mulongi ke vwanda ntangu nionso na mpasi na yandi. Ntangu nionso, ya ke vwanda na kati mpe na ngaanda, na zulu mpe na yisi. Mbote, na yina, ba ke nata nsangu yayi na tata, ntangu tata lombaka. “Wapi mutindu mwana ya munu ke na kutambulaka?”

⁸² Na yina yandi zolaka tuba, “Ya ke mbote ve.” Mbote, na yina, ya kieleka, yina me niongisa ntima ya tata.

⁸³ Mpe yina ke sala bubu yayi, ntangu Mpeve-Santu vwandaka kunata kimbangi ya beto na ntwa ya Nzambi. Ntangu beto kumaka bana ya Nzambi, beto fwana tambula ya kulunga na lubokilu. Beto fwana tambula ya kulunga na nyonso yina Nzambi me tula samu na beto na kusala. Samu Mpeve-Santu me longusa beto, malongi ya bana. Benó me vwandaka ntete. . .

⁸⁴ Ntangu mu vwandaka mwa mwana ya bakala ya fioti, papa ya munu vwandaka ya kuswaswana na yina bayankaka ya batata ya bilumbu yayi kele bubu yayi. Tata ya munu vwandaka kwikila na kubula fimbu, mpe kieleka yandi vwandaka sala yawu. Beto ke bambukaka moyo na yawu. Mpe munu, dyaka, bubu yayi, bamvula makumi yiya na sambwadi me luta, mu ke bambuka moyo na yawu. Kasi ya salaka munu mbote. Yawu longusaka munu. Kana mu lendaka kwenda na ntoni bubu yayi mpe kuvumbula yandi, kima ya ntete mu ke sala ke pesa yandi mbote mpe ke yamba yandi samu na yina yandi salaka.

⁸⁵ Kana mu ke kuwa mutindu yina samu na tata ya munu ya ntoto, yinki ya ke vwanda kilumbu yina ntangu beto ke telama na Mvwandulu ya Yandi? Ntangu, beto ke mona bima kusalama na beto samu na mbote ya beto, ti Yandi zolaka zenga beto mwa fyoti awa, mpe kulongusa beto, mpe kukatula bima ya yinza, mpe beto tambula mutindu bana ya kukikulumusa na ntwa ya

Yandi. Ya lendaka monana mpasi na mbandukulu, kasi Nzambi zaba yina Yandi ke na kusalaka. Kieleka. Yandi zaba yina Yandi ke na kusalaka.

⁸⁶ Mpe Yandi, na yina, mutindu Mpeve-Santu ke banda na kulonga Ndinga, na yina, kana mwana me tumama ve ntangu ya me kuma ya kuyela, nsungi ya kuyela, na yina, mwana kele ntangu nyonso mwana, kieleka, kasi ya ke zimbisa kima mosi.

⁸⁷ Mpe beno tala dyambu yina mu zola kunata ditoma na yinzo. Ti Mpeve-Santu kunata yawu na konso ntima ya beno mikwikidi. Kaka samu ti beno kele mukwikidi, kieleka beno kele na Luzingu ya kukonda nsuka; Nzambi tubaka yawu. Kasi beno zola kukota, mutindu Job tubaka, “Na mpusu ya meno ya beno”? Beno ke zola kaka kukwiza na ntuala ya Tata, mpe na mayele yina Yandi me pesa mosi na mosi ya beno, na kukipaka diambu ve, beno me sadilaka yawu ve, to beno bikaka kima yankaka kutelama na kati ya nzila ya beno? Beno ke bika mwa bima yina zola kutuba kima mosi ve samu na beno, na manima ya nionso, mwa makelele, mpe kubendana, mpe kuswana, mpe baluswaswanu ya dibuundu, beno baka lembami mpe lutondo na luzingu ya beno. Beno zola kutelama na ntuala ya Tata mutindu yina? Mu ke kwikila ve ti beno ke sala yawu. Mu ke kwikila ve ti beno ke sala yawu. To munu ke sala yawu ve.

⁸⁸ Mutindu mu zola Yandi kutuba, “Ya vwandaka mbote ya kusala.” Ve na mpusu ya meno ya munu; kasi, “Ya vwandaka mbote ya kusala, kisadi ya Munu ya mbote mpe ya kukwikama. Kota na bakyese ya Mfumu, samu ti nge salaka mbote na yina nge fwana sala.”

⁸⁹ Ya lendaka vwanda ti beno kele kento ya yinzo. Kana beno kele mutindu yina, Nzambi salaka beno mulongisi ya bana ya beno. Beno sala kisalu ya mbote na yawu. Ata nyonso yina beno fwana sala, beno sala yawu mbote.

⁹⁰ Beno tala, na yina, kana mwana me talisa ti yandi kele ya kulunga na bima yina tata tulaka na zulu ya kimfumu ya yandi, mpe vwandaka mwana ya kieleka ya kukwikama, na yina mulongisi nataka nsangu na tata, “Oh, mwana ya nge. . .”

⁹¹ Oh, ntangu yayi, yina kele nsangu mu zola ti Yandi nata beno mpe munu. “Oh, mwana ya Nge, mabanza ya yandi nionso kele na zulu ya Nge. Nionso yina yandi ke meka na kusala kele samu na kusepelisa Nge. Yandi ke sepelaka mingi na diambu ya Nge, tii kuna ya ke mpasi na kukanga yandi.”

⁹² Mu ke zola kuvwanda na mwa luzatu samu na Kimfumu ya Tata na kisika ya kuvwanda ve na luzatu mosi, samu na Yawu. Mu ke zola mingi kusala. Mpe mutindu Dibundu ya mulongi ya Klisto tubaka na munu, mwa ntangu me luta, “Tata Branham, mu ke zola—mu ke zola kununa na kisika ya kuvwanda na bukelengi.” Mpe ya kele na mingi ya kieleka. Mu ke zola mingi kulwata, “mpe kufwa na kinwaninu,” mutindu Mpangi Neville

tubaka, na kisika ya kumanga kulwata kinwaninu. Beno lenda sala kima mosi ve ya kulutula yimbi ti kuyambula na kumeka. Bika beto sala nyonso yina beto fwana vwanda kusala na yawu. Mpe Mpeve-Santu, Mulongisi ya beto, ke nata yawu na Tata.

⁹³ Mpe ntangu yayi, beno tala, kana mwana me kuma mwana ya bakala ya kikesa, na yina ba tubaka yawu na tata. Mpe na . . . Oh, mu ke zola kaka Ndinga! Na ntangu yina me kubama, yina me kubama na nzila ya tata yandi mosi, mwana vwandaka . . . nkembo ya yandi mpe lukumu monisamaka na ntwala ya bantu nionso. Tata bakaka mwana ya yandi mosi, na yisi ya mukembo, mpe nataka yandi na bisika ya bantu nyonso. Na manima ya yandi . . . Na kuvwandaka mwana ya yandi mosi, ya kubutama na yinzo ya yando mosi, kasi, ba tulaka mwana na kisika na kati ya dibuta, samu na kubyadila bima nyonso yina tata kuzwaka. Beno me mona yawu?

⁹⁴ Ntangu yayi, kana beto ke vwanda mbote, kilumbu mosi ya nkembo beto ke byadila bima nyonso. Nzambi, na kilumbu ya Yandi yina ba kubikaka, ti Yandi ke fundisa bantu nyonso na nzila ya Klisto Yesu. Ntangu ke kwiza ntangu Nzambi ke pesa musendo samu na bayina vwandaka ya kukwikama, mpe kulosama ya bayina lembanaka na kuvwanda ya kukwikama.

⁹⁵ Kaka na ntwala ya kukwenda ya Mfumu Yesu . . . Nzambi vwandaka na kati ya Yandi; Yembe ke twadisa Mwana-dimeme. “Yandi kwisaka ve samu na kusala luzolo ya Yandi, kasi samu na kusala luzolo ya Tata yina fidisaka Yandi.” Yandi twadisamaka na Mpeve, samu na kubaka Pierre, Jacques na Jean, na mongo yayi ya kulutula kitoko. Mu zola yawu!

⁹⁶ Mpe, kima yankaka, kana beno lenda lemvo kila munu samu mu me baka ntangu mingi, kasi mu ke zola kutula na ntwala ya bantu yayi na suka yayi, ti yayi vwandaka na ntendulu yankaka samu na yawu. Na manima ya kubika mongo mpe na kukulumukaka kuna, ba yufulaka kyuvu, “Nani bantu ke tuba ti Munu kele Mwana ya muntu? Nani? Yinki bantu ke tubaka samu na Munu? Mutindu mu kele na beno, mpe mu me monisama na beno, ntangu yayi yinki bantu ke tuba samu na Munu Mwana ya muntu?”

⁹⁷ Beno tala yawu mbote. Wapi kizizi ya kitoko ya bubu yayi! Na manima beno me yamba Klisto, na manima beno me fuluka na Mpeve, yinki bantu ke tuba samu na beno kuna? Yinki bantu ke tubaka, ti ntangu ba ke mona ba-émotion ya beno ya kuningana tii kuna beno lenda ve kuvwanda swi, masa ya meso ya kiese ke kulumuka na matama ya beno, ntangu beno lenda kanga maboko ya beno na ntangu ba ke yimbila mikunga ya Sion; ntangu beno lenda ve kuvwanda swi, ntangu beno ke mona disumu mpe beno fwana zonga ngemba na mutindu nyonso mpe na swi samu na yawu? Yinki bantu ke tuba samu na yawu? Yinki bantu ke tuba, ti ntangu beno kele ya kulala, ke na kufwa,

na mpasi, na mawa, na mutindu ya kufwa, mpe nge ke lomba mwana mosi ya Nzambi na kuvukana na nge na kisambu samu na kubeluka ya nge; mpe beno ke funguna bafoti ya beno mpe beno ke tula kima na ntwala ya Tata, beno tuba, "Tata, lemvokila munu, mpe ntangu yayi mu me ndima Klisto mutindu munganga ya munu," mpe nge me beluka?

"Yinki bantu ke tuba nani Mu kele Mwana ya muntu?"

⁹⁸ Mu ke tala nkonga ya bantu, mpe bayankaka na kati ya beno mu zaba; vwandaka na kati ya mpasi, bamvula me luta, yina vwandaka kufwa na cancer, na kitezo ya nsuka. Bayankaka na kati ya beno na mambu ya mutindu nionso, bifwanisu, bampopo. Mpe Nzambi, na lemvo ya Yandi, belusaka nge. Mpe mutindu nge pesaka kimbangi ya nge ya ngolo na ntwala ya bantu. . .

"Yinki bantu ke tuba ti Mu Mwana ya muntu. . .?"

⁹⁹ Yinki bawu tubaka samu na yawu? Wapi mutindu foto me sobaka kubanda kilumbu yina, ata ti yawu vwandaka ndombe! Bayankaka ke tuba, "Ya kele bufanatiki." Bayankaka bokilaka Yandi, "Béelzébul." Bayankaka ke tubaka, "Ya kele télépathie mentale." Bayankaka ke tuba, "Ya kele ya luzatu." Bayankaka ke tubaka, "Ya kele bufanatiki." Bayankaka ke tuba, "Ya kele emotion."

¹⁰⁰ "Kasi yinki beno ke tuba samu na yawu? Yinki ke tuba na beno diambu yayi?"

¹⁰¹ Pierre muntu ya kingolo-ngolo ke tubaka bambala mingi na nswalu nionso, kasi na ntangu yayi yandi tubaka ve. Yandi tubaka, "Nge kele Klisto, Mwana ya Nzambi ya moyo. Mu ke kipe ve yina bayankaka me tuba. Ya kele yina mu zaba. Nge kele Klisto, Mwana ya Nzambi ya moyo."

¹⁰² Beno kuwa. Beto lendaka lutisa ntangu mingi kuna. Kasi beto landila na kukwenda na ntwala. Yesu tubaka, "Ya kusakumuka. . ." Ata ti bantu lenda singa, ata ti bantu lendaka kuseka. Bantu lendaka tuba ti beno kele exalté. Bantu lendaka bokila beno nkumbu mosi na nsi ya mwini. Kasi Yandi tubaka, "Nge kele ya kusakumuka, Simon Bar-Jonas. Tata ya nge. . ."

¹⁰³ Yawu yayi ntangu yayi. Beno me kubama? "Samu ti nsuni mpe menga ve me monikisa yayi na nge. Ata mbala mosi ve ti nge me longokaka yayi na nzila ya seminere mosi. To beno me longuka yawu ve na nsamunu mosi ya théologie ya muntu mosi. Nsuni mpe menga ve me monikisa yayi na nge, kasi Tata ya Munu yina kele na Mazulu me monikisa yayi na nge." Beno me mona kisika ya me katuka? Na nzila ya Mulongisi, Mpeve-Santu, me monisa yawu na nzila ya luzayikisu.

¹⁰⁴ "Mpe mu ke tuba na nge, nge kele Pierre, mwa ditadi. Mu kele Ditadi ya nene. Mu kele Ditadi ya nsongi, kasi beno kele mwa ditadi yina ba me tula na zulu ya Munu. Mitungi me sola beno. Ata mbala mosi ve ti beno me solaka beno mosi.

Mitungi me sola beno. Bawanzio ya Nzambi, nkokila mosi, na kusalaka na kimvuka ya nene, bokilaka beno na kubasika, mpe beno kukipesaka beno mosi na Munu. Mpe mu zengaka beno na nsalulu ya Munu mosi. Mu salaka beno mutindu yina mu zolaka beno kuvwanda. Mu salaka kumona; beno bikana kaka swi. Mpe mu me tula beno ntangu yayi mutindu mwa ditadi, na kulunga na mwa ditadi yankaka, samu na kutwadisa ditadi yina; mpe ditadi yayi ke twadisa ditadi yina, ditadi yina. Mpe sima ya zola ke nata beno kintwadi, samu na kusala Lufulu, yina mu kele, kuvwanda kintwadi na konso ditadi yina ke tubaka Nkumbu ya Munu mpe ke kuzwa luzayikisu yayi.”

¹⁰⁵ “Mpe na zulu ya ditadi yayi, luzayikisu ya Nzambi, yina ke telama swi mpe ke zenga, (ditadi, na nzila ya luzayikisu), Mu ke tunga Dibuundu ya Munu, mpe mielo nionso ya difelo ke nunga Yawu ve.” Na kulakisaka yawu, kieleka, myelo nyonso ya difelo ke telemina yawu, kasi ke nunga ata mbala mosi ve.

¹⁰⁶ Mpe bika mu baka ntangu yayi samu na kutuba yayi, nkundi ya munu, ti, Dibuundu ya muvimba ya Nzambi ya moyo me tungama na zulu ya luzayikisu ya kimpeve ya Mfumu Yesu Klisto. Ata mutindu beno me longukaka, wapi mutindu beno lendaka vwanda na mayele, wapi mutindu mbote beno lendaka banza ti beno zaba Biblia, Satana zaba Yawu kaka mbote mingi kulutula beno. Kasi kaka na nzila ya luzayikisu, Nzambi na nzila ya Mpeve-Santu, Mulongisi ya beno, me monisama na beno, ti Yandi ke vulusa beno na lemvo ya Yandi.

¹⁰⁷ Kana Yandi ke monisa na beno na suka yayi, na nzila ya luzayikisu, ti yayi kele nsuka ya mpasi ya nge, yayi kele nsuka ya kimbevo ya nge, bampeve nionso ya yimbi ke basika ata fioti ve na kisika yina, ata ti konso dokotolo ke tuba ti ya kele luvunu. “Samu ti na zulu ya ditadi yayi Mu ke tunga Dibuundu ya Munu, mpe mielo ya difelo lenda ve kununga Yawu.”

¹⁰⁸ Ata ti ya ke telemina yawu, kasi ya lenda nunga ve. “Samu ti ntangu mbeni ke kwiza mutindu maza, Mpeve ya Nzambi ke telemisa bendele na zulu ya yawu,” konso ntangu. Beno me mona yawu? Beno me bakula yawu? Ntangu yayi, Yesu, me monisama na bilandi.

¹⁰⁹ Beno tala na disamba ya Eden, ntangu Cain kotisaka dikabu samu na kusambila, mutindu mosi Abel salaka. Yandi sambilaka. Yandi futaka na dibuundu. Yandi pesaka munkayulu. Yandi salaka bisalu nionso ya musambidi, ya kusyema, kulutula mbote, ya kulengula mingi, kulutula yina Abel salaka. Yandi tungaka autel ya kulutula mbote. Yandi salaka yawu ya kulutula kitoko. Yandi tulaka kungenga na kusambila ya yandi. Beno me mona mutindu yina ke tambula kaka na kati-kati ya bana ya Adam? Yandi tulaka kungenga na yawu, na bambuma ya bilanga, mpe lis ya nene. Mpe yandi, kaka yina ve, kasi yandi sambilaka. “Ya kele na mutindu yina ke monana mbote na muntu.” Kasi,

yina yandi salaka, yandi sambilaka na nzila ya luzabu. Yandi sambilaka ve na nzila ya luzayikisu.

¹¹⁰ Mpe ya lenda salama. Beno me bakula yawu ntangu yayi. Beno kuwa. Beno lenda sambila na nzila ya luzabu. Beno lenda kwenda na dibuundu, na nzila ya luzabu ti beno lenda sala yawu. Kasi kukwenda na dibuundu, mutindu yina, ya ke na kusambilaka na mpamba. Kasi ntangu kima mosi ke salama na kati ya ntima ya beno, yina ke sala beno zola Nzambi, na mutindu yina beno lenda ve bikana na dibuundu, ya kele luzayikisu, Nzambi ke na kumonisama.

¹¹¹ Ba vwandaka ve na Biblia kuna. Ba vwandaka ve na mukanda to ya kukangama na kisalu. Ba vwandaka ve na balukolo ya ndongosolo. Na yawu, Abel, na nzila ya luzayikisu, ya monisamaka na yandi na nzila ya Nzambi, ti, “Ya vwandaka kitoko ve, to dyaka ya vwandaka bambuma ya bilanga, to ba-pomme, yina basisaka bawu na ngaanda ya disamba ya Eden, kasi ya vwandaka menga.” Mpe yawu monisamaka na yandi, mpe yandi kwendaka mpe bakaka mwana-dimeme. Na luzayikisu, yandi monaka na ntwala Nkwizulu ya Mwana-dimeme ya Kulunga. Mpe yawu monisamaka na yandi, na yina yandi bakaka mwana-dimeme. Mpe na nzila ya luzayikisu, yandi pesaka yawu na Nzambi, mpe ndimaka yawu. Dibundu ya muvimba kele ya kutunga na zulu ya luzayikisu ya kimpeve. Yinki kitoko!

¹¹² Ntangu yayi, na kukumaka pene-pene. Ba vwandaka na zulu ya mongo. Mpe na manima Yesu vwandaka Mwana ya kutumama; nzutu, Mwana-dimeme, twadisamaka na Mpeve-Santu, Nzambi na kusalaka na kati ya Yandi. “Mu me kwisa ve samu na kusala luzolo ya Munu, kasi luzolo ya Yandi yina fidisaka Munu. Mpe Yandi yina fidisaka Munu, Tata yina fidisaka Munu, kele na Munu. Mpe mutindu Tata fidisaka Munu, mpe kwendaka na Munu, mutindu mosi Mu ke fidisa nge.” Yandi fidisaka kaka ve, kasi Yandi kwendaka na Yandi.

¹¹³ Mpe Nzambi ke pesa kaka ve malongi na muntu mpe ke fidisa yandi na nsamunu mosi ya nzingulu ya seminere. Kasi, kana yandi kele na bisadilu, Nzambi ke tambula na yandi. “Mu ke vwanda na beno, ata mpe na kati ya beno, tii na nsuka ya nsungi.”

¹¹⁴ Beno tala, mutindu ya kitoko mingi, oh, mutindu Ndinga ke salaka mutindu yina ke tambulaka kintwadi! Wapi mutindu Mpeve-Santu me tula Yawu na kati ya ntima ya bantu, na nzila ya luzayikisu mpe zola ya Mfumu Yesu. Beno tala mbote.

¹¹⁵ Kuna, na manima ya kutumama, “na yinwa ya bambangi zole to tatu,” bambangi ya kulutula mbote yina telamaka na zulu ya ntoto. Zola. . . Pierre, Jacques, mpe Jean; kivuvu, lukwikilu, zola. Na yisi ya bambangi ya kivuvu, na yisi ya bambangi ya lukwikilu, na yisi ya mbangi ya zola; Nzambi tulaka Mwana ya Yandi, na kisika, na ntwala ya bantu nyonso, ya bakumonisama

nionso tatu ya kulutila nene (kivuvu, lukwikilu mpe zola) ti yinza ke zaba.

¹¹⁶ Mpe, kuna, mutindu tata na bilumbu ya ntama basisaka mwana ya yandi ya bakala mpe tulaka robe na zulu ya yandi, mpe salaka nkinzi, mpe na manima ya yina nkumbu ya mwana vwandaka kaka mbote mutindu tata. Mwana vwandaka kilandi ya bima nionso.

¹¹⁷ Mpe Nzambi bakaka Klisto na zulu ya mongo ya nsobolo, na mbangi ya kivuvu, lukwikilu, mpe zola, mpe fikaka Yandi na Dituti. Mpe Biblia ke tuba, “Bilele ya Yandi vwandaka sema mutindu mwini. Mpe Ndinga mosi me katuka na Zulu, na kutubaka, ‘Yayi kele Mwana ya Munu ya luzolo.’”

¹¹⁸ Ntangu yayi, Pierre vwandaka na nsayi, mutindu beto nyonso. Yandi vwandaka muntu ya luzatu mingi. Mpe mu zola ti beto nionso ke vwandaka na luzatu; bantangu mingi beno lenda kutuba bima ya mbote na kati ya bisalu ya beno ya luzatu. Kasi Pierre vwandaka na kyese nyonso ntangu yandi monaka kieleka yina salamaka. Nzambi zolaka bika yandi kuzwa kimbangi kaka na mwa ntangu fyoti, na manima bawu kulumukaka. Kasi ntangu yandi monaka, ya kutelama. . . Ya vwandaka na tatu awa: kivuvu, lukwikilu, mpe zola. Mpe ya vwandaka na tatu ya kutelama kuna na zulu ya mongo: Pierre, Jacques, mpe Jean, awa. Moise, Elie, mpe Klisto, ya kutelama *kuna*, na kati ya nsiamisa ya tatu yayi awa. Ntangu yayi, bawu talaka. Kuna telamaka Moise, ntete; yina landaka telamaka Elie, profete.

¹¹⁹ Mpe bantu yankaka ke yufula beto, “Beto ke zaba mosi na yankaka ntangu beto ke kuma kuna?” Ntangu, Elie na Moise kwendaka, bankama mingi ya bamvula. Ve kaka beto ke zaba mosi na yankaka, beto ke zaba bawu yina beto me monaka ntete ve. Pierre, Jacques mpe Jean, monaka Moise ata fioti ve, mpe kasi zabaka bawu na mbwetolo ya disu, ntangu bawu vwandaka ya kutelama na yisi ya Kivudi ya yina kele ya Ngolo nyonso. Yinki ya ke vwanda ntangu beto ke telama Kuna? Mu ke zaba Sankey ntangu mu ke mona yandi. Mu ke zaba ndinga ya yandi, ata ti mu kuwaka yandi ve. Mu ke zaba Wesley. Mu ke zaba Moody, Calvin, Knox. Beto ke zaba bawu nionso ntangu beto ke kuma kuna. Beto ke baka kima ya mutindu yankaka na yina beto kele ntangu yayi. Beto ke vwanda na mwa ntangu fioti. . . to—to, na kitezo ya nkembo. Pierre, Jacques, mpe Jean vwandaka. Na yina, na kati ya dibanza yayi ya mantwala, kana bawu lendaka zaba babakala, kukondwa kifu mosi, yina ba me monaka ata fioti ve to me monaka ve kifwani ya yawu, yina kwendaka bankama ya bamvula; kasi, na dibanza ya mantwala, lendaka, na mwa ntangu fioti ke zaba bawu, kukondwa ntembe; yinki ya ke vwanda ntangu beto ke kuzwa nkembo, ya kutelama na Mvwandulu ya Yandi? Beto ke zaba mosi na yankaka? Kieleka. Beto ke zaba muntu nyonso. Mwa kitini ya seko ke vwanda na zulu ya beto, mutindu Nzambi kele ya seko.

Beno tala. Mu fwana sukisa. Mutindu bawu talaka, mpe Pierre...

¹²⁰ Mutindu mulongoki ya kieleka ya seminere ke tuba, “Beno zaba, mu ke kwikila ti mabuundu nyonso kele ya kulunga. Kana beno kele orthodox na kati ya lukwikilu ya beno, ya ke sala dyambu ve, na yina beto ke vwanda kaka na ba-Musulman mpe ba-Bouddha, mpe beto ke kuzwa bawu nionso kintwadi.”

¹²¹ Pierre tubaka, “Ya kele mbote samu na beto na kuvwanda awa, mpe beto tunga ntangu yayi ba-tabernacle tatu. Beto ke tunga seminere awa samu na Moise. Beto ke tunga seminere samu na Elie. Mpe nyonso yina zola kusambila na yisi ya musiku, mpe nyonso yankaka yina, bika ti bawu sambila.” Mpe ntangu yayi beto ke tala. Ba talaka, mpe Pierre mpe bayankaka, vwandaka tala mbote Moise. Moise talisaka musiku.

¹²² Nzambi pesaka bana ya Israël musiku samu ti bawu zolaka musiku. Nzambi zolaka ve ti bawu kuzwa yawu. Yina kele nsodolo ya muntu. Na Exode 19, ba tubaka, “Nge ke pesa beto kima mosi ya kusala, samu na kuzwa mpulusu yina me fwana na beto. Beto ke zitisa musiku, kana Nge pesa yawu na beto,” na nzonzolo yankaka. Kasi, ya vwandaka ata mbala mosi ve dikani ya Nzambi.

¹²³ Ya kele mbote na kubika dikani, beno mosi, mpe kusadila kaka dikani ya Yandi. Mu ke mona yawu mpasi mingi, samu na kubaka dikani ya Yandi.

¹²⁴ Kuna telamaka Moïse, musiku. Pierre tubaka, “Mbote, bayankaka ya beto ke zitisaka musiku.” Ntangu yayi, ya kele ve na nsuni ya kunungisama na nzila ya musiku.

¹²⁵ Na yawu, na manima, na manima ya musiku ya Nzambi telamaka kuna; yina landaka, telamaka, vwandaka Elie. Ya kele mutindu bawu kwizaka, na nzila ya bantalu. Yina landaka, telamaka, vwandaka Elie, yina kwizaka na manima ya Moise. Mpe Elie talisaka ludedomo ya Nzambi, baprofete. Mpe Elie talisaka ludedomo ya Yandi, na mutindu ti Elie basisaka tiya na mazulu mpe kufwaka makumi tanu. Mpe yandi vwandaka talisa ludedomo ya Nzambi.

Na yawu, Pierre zolaka musiku ya Nzambi mpe ludedomo ya Nzambi.

¹²⁶ Muntu ve lenda kuzwa mpulusu na nzila ya musiku. Mpe kana beno kondwa, na kufwa musiku, ya kele kaka na kima mosi me bikana, mpe ya kele lufwa. Ya kele ludedomo ya Nzambi. Nzambi—Nzambi ke lombaka yawu. Musiku ya Yandi ya kusungama fwana vwanda... kuvwanda na ludedomo.

¹²⁷ Na yawu, kuna, na yina Pierre vwandaka tuba, yandi vwandaka zola kutunga tabernacle ya yandi, mpe lombaka na Nzambi kana yandi lendaka sala yawu, kuna bawu talaka na manima mpe monaka Yesu kaka.

¹²⁸ Musiku kubwaka. Bika beto, na suka yayi, beto katula meso ya beto na ludedomo ya beto mosi, to kima yina beto salaka. Mu ke lomba ve musiku. Ba lenda fundisa munu ve na nzila ya musiku, samu ti mu kele ya kukondwa musiku. Muntu ve zitisaka musiku. Ba lendaka ve kuzitisa musiku.

¹²⁹ Mpe to ve dyaka nge lenda kukivulusa nge mosi. To ve nge lenda kukibelusa nge mosi. Mpe kana musiku, na luzolo ya beno mosi, beno zolaka kulakisa yawu na dikani, na yina ya kele kaka na kima mosi yina lombaka musiku, kana beno kubwa, ya kele kieleka. Mpe, ludedomo, kele kufundisa mpe kufwa ya ntangu nionso. Ya ke lomba kuzimbana ya muvimba. Samu ti, yandi yina ke buka ditonzi mosi ya musiku kele ya kubwa na musiku nyonso. Na yawu, beno fwana kufwa, kasi Nzambi. . . na mutindu beto ke tala musiku ya Nzambi, mpe beto ke tala na ludedomo ya Nzambi.

¹³⁰ Bika ti beto katula meso ya beto mutindu yankaka. Beno tala *awa*. Yesu telemaka kuna, ke talisa zola ya Nzambi. Musiku ve, ludedomo ve, kasi na kati ya Yandi wandaka kulungisama ya musiku mpe ludedomo. “Yayi kele Mwana ya Munu ya luzolo.” Yimeni na bima yina me salama na maboko. Beno kuwa mulongisi ya beno. Ya kele samu na yina Pierre lendaka tuba, “Nge kele Klisto, Mwana ya Nzambi ya moyo.” Musiku mpe ludedomo ba kutanaka na kati ya Klisto, mpe ya kele luzolo ya Nzambi samu na dikanda ya bantu. Zola ya Nzambi! “Nzambi zolaka mingi yinza!”

¹³¹ Nzambi ya kyadi, na suka yayi, mutindu mu ke lomba samu na nkonga ya bantu yayi, beto ke lomba ve musiku, beto ke lomba ve musiku mosi. Beto zola ve kufundisama na ngolo ya bawu mosi. Mu zola ve ludedomo ya Nge, Mfumu. Ve, samu na lufundusu ya Nge ke kwisa na zulu ya munu; ata fioti ve, Mfumu. Kasi, mu ke lomba kyadi ya Nge.

¹³² Yandi tubaka, “Beni kuwa Yandi.” Samu na yinki mu ke kuwa Yandi? Yandi kele kaka yandi yina kele na mpulusu. Marie, Joseph, mpe basantu yankaka nionso wandaka bantu ya nene, kasi kaka Yandi. “Beni kuwa Yandi.” Yandi kele kaka musambidi. Yandi kele kaka muvukisi kati-kati ya Nzambi mpe muntu, kele Klisto Yesu.

¹³³ Samu na yinki mu ke kuwa Yandi? Musiku lendaka ve kupesa munu ngemba; Yandi lenda. Ludedomo lendaka nata munu kima mosi ve, kaka lufundusu. Yandi pesaka munu ngemba mpe kuvutula ngwisani. Musiku lenda fundisa munu, samu ti, kana mu bela, musiku ke lomba ti mu kuzwa nyonso zole, misiku ya yinza mpe ludedomo ya Nzambi, me lungisama na zulu ya munu, na yawu mu fwana futa kitumbu. Kasi mu ke balula baluzolo ya munu mpe meso ya munu, na suka yayi, na musiku nyonso zole mpe ludedomo, mpe beno tala luzolo ya Nzambi yina vutulaka munu na Yandi, na nzila ya lemvo, mpe

na nzila ya musiku ve mpe na nzila ya ludedomo. Kasi, samu na kuvutula ngwisani, Yandi futaka ntalu samu na kunata muntu mpe Nzambi kintwadi, samu na kusala bawu mosi.

¹³⁴ Kuna na Suisse, ntama mingi ve. . . Mutindu mu ke sukisa diambu yayi. Mingi na kati ya beno bana na lukolo, mu banza ti beno kele dyaka na yawu, na disolo mosi ya ntama yina zolaka kufwa ata mbala mosi ve. Ata ti, ya ke na kuzimbanaka bubu yayi, na yinsi ya beto, kasi ata mbala mosi ve ti ya ke zimbana na Suisse kisika ya salamaka. Beno ke bambuka moyo na lukolo ya beno, na reader's Arnold von Winkelried, héro ya nene ya Suisse? Beno lenda tuba nkumbu ya yandi, bubu yayi, kuna na Swiss Alps, mpe bizizi ya bawu ke mata mpe masa ya meso ke kulumuka na matama ya bawu. Bamvula mingi me luta. . .

¹³⁵ Ba-Suisse kele bantu ke zolaka ngemba. Bawu kele ba-Allemands yina, ntama kuna na mbandukulu ya bansungi, kwendaka kuna na kati ya miongo kisika vwandaka ve na minerai to kima mosi ve. Kasi bawu sumbaka. . . Bawu kele na mayele ya ba-Allemand. Bantu ya Allemagne ke banzaka ti yandi kele dikanda ya kimfumu, ya kele kieleka, kasi yandi ke meka na kusala munduki to bombe yina ke nunga yinza ya muvimba na mayele ya yandi. Kasi ba-Suisse kele bakala yina ke zolaka ngemba. Yandi ke kulumuka mpe ke sala yandi. . . ke kuzwa yandi kima mosi, mpe ke sala mfinangani ya yandi kutala monte, mpe ke zinga na ngemba.

¹³⁶ Kuna, kuna na zulu ya myongo ya Suisse, bamvula mingi me luta, ntangu ba tulaka kimfumu ya bawu—ya bawu, to mu zolaka tuba luyalu ya bawu, ba vwandaka ve yinsi ya basoda. Ba vwandaka yinsi ya ke zolaka ngemba.

¹³⁷ Mpe kilumbu mosi, ntangu bimpumbulu kwisaka na yinsi ya bawu mpe vwandaka kudiata bima nionso bawu kuzwaka; kima mosi ve, kima mosi ve, ata yina bawu tungaka. Bawu balusaka matadi na zulu ya myongo, mpe yawu yangisaka bawu ata fioti ve. Mpe ba vwandaka na makesa ya Suisse yina vutukaka na kilanga mosi na yisi ya mongo.

¹³⁸ Mpe ya kele kitoko mingi na Suisse, mutindu mu vwandaka tala bawu mbote, mutindu bawu ke salaka bilanga; mpe na bayinsi ya yisi; mpe yina ke landa kele kibulu, mpe na manima kuna na zulu ya mongo kele dimeme, mpe nzila nyonso na zulu kele kisika bawu ke telemisa bankombo ya bawu.

¹³⁹ Mpe wapi mutindu bawu kele na yodel ti bayina ba ke bokilaka bantu ya yodel ya Hollywood ya Amerika ke sekaka, ata mbala mosi ve ba fwanikisa na yawu. Wapi mutindu bawu vwandaka bula bangengele ntangu bawu vwandaka na mpasi, ti, mpe bamfinangani nionso vwandaka kwenda mbangu kintwadi ntangu ya vwandaka na nsatu mosi. Mpe ntangu yayi beto ke sadila yawu mutindu orchestre ya jazz, rock-and-roll. Oh, ya kele mutindu. . . Mutindu mvindu!

¹⁴⁰ Beno kuwa, bankundi. Mu ke sala nsamunu ya ntwadisi ya munu: “Kana Nzambi ke fidisa ve lufundusu na nsungi yayi ya kindumba ya bantu, Yandi fwana vumbula Sodome mpe Gomorrhe, mpe kulomba pardo samu ba yokaka bawu na tiya.” Ya kieleka. Kieleka. Yandi kele ya kudedama, mpe kuna ya lendaka vwanda ve na kima yankaka yina ke salama kasi Nzambi fwana sala yawu. Mpe na ntangu kyadi me simba maboko ya Yandi ya kuzibuka, beno tina na Yawu.

¹⁴¹ Mpe kuna, na zulu ya mongo, kisika mwa makesa yayi vwandaka na minduki yina ba lendaka kuzwa, binwaninu, mpe bayinti, balutebo ya bingwenwe, mpe nionso yina ba lendaka kuzwa, mpe ba-fourche. Kintwadi, makesa ya nene yina ya kulutula ntoto kwisaka mutindu kibaka ya ngolo ya biliki. Bawu vwandaka na babakala nionso ya kulongusa, na bambele ya nene, bawu vwandaka kwenda na ntuala, kintwadi, na kuvutulaka mwa makesa yayi ya Suisse na zulu ya mongo. Bawu vwandaka na kivuvu. Nyonso yina bawu vwandaka meka vwandaka nyonso ndombe mpe mpimpa, mpe kima ve zolaka vulusa bawu.

¹⁴² Na manima ya mwa ntangu fioti, na kati-kati ya bawu, kwisaka kuboka ya mosi, Arnold von Winkelried. Mpe yandi basikaka, mpe yandi tubaka, “Bampangi, bubu yayi mu ke kufwa samu na Suisse mpe samu na kimpwanza ya yawu.” Yandi tubaka, “Beto ke zolaka yinsi ya beto mpe yina batata ya beto me nwana, mpe yina batata ya beto zolaka ti beto kuzwa. Mpe, bubu yayi, économie ya beto ya nene kele na kisika mosi. Mpe bubu yayi mu me pesa luzingu ya munu ya mpamba samu na Suisse.” Yandi tubaka, “Kuna, na manima ya mongo, kele yinzo ya munu ya luzolo, mpe kento ya munu ya luzolo ya lembami, mpe mwa bana ya munu, na kuingilaka munu kuvutuka. Kasi,” yandi tubaka, “Mu ke mona dyaka bawu ve na zulu ya ntoto yayi.” Yandi tubaka, “Bubu yayi, mu ke kufwa samu na Suisse.” Yandi . . .

Bawu tubaka, “Yinki nge ke sala, Arnold von Winkelried?”

¹⁴³ Yandi tubaka, “Beno landa munu. Mu ke buka bandonga ya makesa. Mu ke buka kimvuka ya bawu. Mpe kuna beno ke baka nionso yina beno kele na yawu, mpe beno ke nwana mutindu beno lendaka sala. Mutindu muntu ya mvita, beno nwana na yina beno kele na yawu, ya kulutula mbote beno lenda.”

¹⁴⁴ Mpe yandi telemisaka maboko ya yandi, mpe yandi talaka na ziunga ya yandi na kisika dionga ya kulutula nene vwandaka kwisa, mutindu yandi vwandaka tambula malembe-malembe. Mpe yandi telemisaka maboko ya yandi mpe bokaka, “Beno sala nzila ya kimpwanza!” Mpe yandi kwendaka mbangu na bayina vwandaka belama na kibaka yina ya babiliki. “Sala nzila ya kimpwanza!” yandi bokaka. Mpe yandi kwendaka mbangu na madionga ya kulutula nsongi, mpe yandi losaka maboko ya yandi

na zulu ya madinga, mpe yandi vukisaka yawu na ntulu ya yandi mpe yandi kufwaka. Mpe bantu ya Suisse, mutindu bawu vwandaka landa yandi, na yina bawu kuzwaka. Yawu nataka luzatu ya mutindu yayi, tii yawu bukaka ndonga ya bawu. Bakala nionso vwandaka na ngaanda ya kisika ya yandi; bawu zabaka ve yinki kusala. Mpe bantu ya Swisse kwisaka mbangu mpe bakaka lunungu, mpe Swisse me kuzwaka mvita ata fioti ve kubanda kuna. Ba ke bambuka yawu na Suisse, ntangu nionso ya kele na Suisse, Arnold von Winkelried ba ke bambuka moyo na yawu.

¹⁴⁵ Kasi, yina kele hero ya kitoko, beno me mona, ba me fwanikisa yawu ata fioti ve, kasi ya kele kima ya fyoti, kaka kima ya fyoti, na kilumbu mosi ntangu bana ya Adam. . .

¹⁴⁶ Ntangu musiku kubwaka, mpe ntangu ludedomo ya bapofete kubwaka; kisika musiku vwandaka ya kulemba mpe lendaka vulusa ve, na nzila ya munkayulu ya mwana-dimeme. Menga ya kibulu mpe mpeve ya kibulu lungaka vutuka ve. Yawu kubwaka. Satana zabaka ya kulutula yina. Mpe ntangu ludedomo ya Nzambi, kasi, ke bokila tiya mpe ke yoka makumi tanu, mpe balufundusu yina bapofete pesaka na ntoto, muntu ntangu nyonso kwendaka na kuzimbana. Kivuvu nyonso kwendaka. Nzambi fidisaka musiku, Nzambi fidisaka bapofete; mpe bawu nionso kubwaka. Bivuvu nyonso kwendaka, samu na bantu nyonso.

¹⁴⁷ Kilumbu mosi, na kati-kati ya bitezo ya Nkembo, Mwana ya Nzambi basikaka. Yandi tubaka, “Bubu yayi, mu ke kwenda mpe ke vulusa bana ya Adam.” Mpe ntangu Yandi telamaka kuna, ntangu bivuvu nyonso. . .

¹⁴⁸ Diabulu ke tula kimbevo na zulu ya beto, yandi ke tula disumu na zulu ya beto, mpe beto zolaka baka yawu; ludedomo ya musiku lombaka yawu. Mpe kana beto kondwa na kuyamba musiku, na yina beto nyonso kele ya kufundisa na nzila ya musiku, ludedomo kaka ba tulaka na kusalu. Ya vwandaka ve na nzila; kima mosi ve beto lendaka sala.

¹⁴⁹ Kasi Yandi kwizaka pene-pene. Wanzio tubaka, “Yinki Nge ke sala?” Yandi kwendaka na zulu ya ntoto.

¹⁵⁰ Mpe Yandi tubaka, “Ntangu yayi beno, mosi na mosi ya beno bana ya Adam, beno baka yina mu ke pesa beno samu na kunwana, mpe kunwana mutindu beno lenda, ya kulutula mbote beno lenda sala.”

¹⁵¹ Mpe ata mbala mosi ve ti Yandi kuzwaka kisika ya kulemba, na nzila ya théologie, to ve lutungu ya ba-seminaire, to lutungu ya mabuundu; kasi Yandi kwendaka kisika madinga vwandaka kulutula nene, kuna na kiwanda ya kivudi ya lufwa. Mpe Yandi vukisaka lufwa mpe kimbevo, na maboko ya Yandi, na ntulu ya Yandi mosi. Mpe fidisaka Mpeve-Santu na Kilumbu ya Pentecote, samu na kutula na maboko ya beto, mpe kulomba

konso mwana ya Adam na kunwana mutindu beto lenda. Ata ti ba ke seka beno, ata ti ba ke talisa beno mpasi, ata ti ba ke bokila beno “exalté,” nyonso yankaka; beno nwana mutindu beno lenda, samu ti lunungu kele kieleka. Mpe matondo na Nzambi, mbeni me basika na nzila, bankonga ya yandi me panzana, mpe Kapita ya nene ya mpulusu ya beto ke na kutwadisa, bubu yayi, na nzila ya mbotika ya Mpeve-Santu.

¹⁵² Oh, bana ya babakala mpe bana ya bakento ya Adam, samu na yinki beno me vwanda awa tii beno ke kufwa? Bika beto telama mpe beto sala kima mosi. Bika ti beto baka yina beto me kuzwa, kana ya kele diaka na kikoba yina ke kufwaka yina lendaka ningana diaka. Beto pesa lukumu na Nzambi. Beto tonda Yandi samu na mpulusu ya beto.

¹⁵³ Kana beno kele musumuki, beno lenda ata mbala mosi ve kubokila beno mosi na kimvuka ya nene ya ntoto yayi, ti Nzambi me basisa beno na Nsangu ya mbote. Kasi, beno vwanda swi mpe beno bika Nzambi mona beno, samu na kutula beno na kati ya Kivinga.

¹⁵⁴ Kana beno kele mbevo, beno bambuka moyo, Yesu nungaka lufwa, difelo, kimbevo, ntoni, mpe nionso, ntangu Yandi kufwaka samu na beno na Calvaire. Beto baka yina beto ke na yawu na suka yayi, mpe beto nwana tii na luzabu ya beto ya kulutula kitoko.

¹⁵⁵ Na yina beto ke kulumusa bayintu ya beto na kati ya mpova ya kisambu; mpe kana mu lombana na mpangi ya kento na kwiza mpe kubula piano, nkunga mosi ya mbote. Na ntangu yina beto nyonso...

¹⁵⁶ Bantu kiwidi ya mbote, ya ndwenga, beno ke sepela, na suka yayi, lufwa ya Mfumu ya beto Yesu? Mabuundu ya beno ke simba ve, ata ti, mutindu mbote ya lendaka vwanda. Balukolo ya beno ke vwanda na kiadi, ata ti, mbote mutindu ba lendaka vwanda. Dokotolo ya beno ke vwanda na kiadi, mbote mutindu yandi lendaka vwanda. Kasi, na suka yayi, beto balula meso ya beto, beto balula meso ya beto na misiku ya mabuundu mpe ba-denomination, mpe kimalu ya dokotolo, mpe mbote mutindu bawu nyonso kele, mpe beto kuwa Ndinga yina katukaka na Kivudi yina ke fika beto na suka yayi, “Yayi kele Mwana ya Munu ya luzolo; beno kuwa Yandi.”

¹⁵⁷ Tata ya Mazulu ya luzolo, na kukikulumusa nionso mutindu Baklisto lendaka belama, beto me kwisa samu na mambote ya bantu ya kuzimbana mpe bantu ya nsatu. Baka bampova yayi, bubu yayi, mpe, oh, Mpeve-Santu yina ke na kutwadisa Dibundu, mulongisi bana ya Nge na Nzambi, bubu yayi. Mingi fwana kubwa na lweka ya nzila, mpe kuzaba diaka ve nzila ya Nzambi. Bawu vwandaka mudidi mpe ndombe, bivuvu ya bawu me kubwa, kasi bika ti bawu mona diaka Calvaire, kisika Nge kangaka matolotolo ya tiya ya mbeni ya lufwa, mbeni ya

kimbevo, mbeni ya mawa, mbeni ya bantu nionso. Mpe kuna Nge tulaka yawu na ntulu ya Nge, mpe pasulaka nzila. Mpe na kati ya kivudi yina ya ndombe, na suka yayi, beto ke mona Yinzo ya beto na Nkembo.

¹⁵⁸ Mutindu Winkelried tubaka, “Na manima ya mongo kele yinzo, bawu ke vingila munu kukwiza, kasi bawu ke mona munu dyaka ve.”

¹⁵⁹ Kasi, Yesu, Nge tubaka ata fioti ve, “Ba ke mona Munu dyaka ve.” Nge tubaka, “Na yinzo ya Tata ya Munu kele na bisika mingi ya kuvwanda. Mu ke kwenda mpe mu ke kubama, mpe mu ke kwisa mpe mu ke baka nge, mpe mu ke yamba nge na Munu mosi.” Mutindu beto ke zitisa lufwa ya ngolo ya Winkelried; kasi, yandi wandaka muntu yina ke kufwa, yandi lendaka kufwa kaka mpe kukwenda na manima. Kasi Nge me kwiza samu na kufwa mpe kuvulusa, mpe me nata beto, ve na baya beto ya luzolo, kasi na baya beto ya luzolo; ve na bayinzo ya beto, kasi na Yinzo ya beto. Mpe zengaka nzila na nzila ya mpimpa ya lufwa, ti beto lenda mona na manima ya vwale kisika kele balusakumunu ya Nzambi.

¹⁶⁰ Mpe ntangu yayi, bubu yayi, Tata ya Luzolo, kana ya kele na mosi ya bana ya Nge yina Nge me semba na Nsangu ya mbote, kubanda na kisalu ya luzingu, mpe zola kusala yawu mutindu yayi, ba me semba bawu na suka yayi, na kuyidikaka bawu, na kuzengaka bilele ya bawu, mpe mabanza ya bawu ya yimbi, mpe bakutonga ya bawu mpe kuvutuka ya bawu na manima. Mpe ntangu yayi Nge zola tula bawu diaka, mpe lunga sala bawu na kati ya Kivinga. Nge lenda tuba na bantima ya bawu na ntangu yayi?

¹⁶¹ Mpe na yina beto me kulumusa bayintu ya beto, ya ke vwanda na mwana mosi awa, bubu yayi, yina me kwenda ntama na nzila, to mu banza yina me kwisaka na nzila ata fioti ve? Kasi beno kele na nsatu, bubu yayi, ti beno zola ti ba kotisa beno; beno ke zola kuvwanda ditadi yina me lunga na kati ya Lutungu ya Nzambi? Beno zola kutelemisa diboko ya beno na Klisto, kutuba, “Klisto, katula bima ya munu ya yinza.”

¹⁶² Nzambi sakumuna nge na manima kuna, ntwenya ya bakala. Nzambi sakumuna nge, mama. Nzambi sakumuna nge, tata. Nzambi sakumuna nge, mpangi ya munu ya kento. Nzambi sakumuna nge. Muntu yankaka?

¹⁶³ Ntangu yayi na bayintu ya beno ya kukulumusa, mutindu beto ke na kuingila na Mpeve-Santu, mpe beno zaba kana beno me kondwa Nzambi to ve. Beno me kondwa na kukwenda ntangu Munungi ya beno ya nene tubaka, “Kwisa, landa Munu. Baka kulunsi ya nge, kukimanga nge mosi, kwisa landa Munu. Mu ke buka bandonga ya mbeni. Mu ke buka bandonga ya disumu. Mu ke buka bandonga ya kimbevo. Mpe beno ke landa Munu mpe beno ke nwana mutindu beno lendaka sala, samu Mu ke sala

dibulu mosi na kati ya yawu, mpe bayinzo ya beto ke kebama na Luzingu ya Kukonda nsuka.”

¹⁶⁴ Beno kele nzenza ntama na Nzambi? Beno telemisa kaka maboko ya beno, mosi. . . Nzambi sakumuna nge, mwa muntu ya fioti. Muntu yankaka yina me telemisa maboko ya bawu ata fioti ve, kasi ba me telemisa diboko ya bawu. Beno tuba, “Bambuka moyo na munu, Mpangi Branham, bubu yayi. Mu zola ntangu yayi kukwiza na Klisto. Mu. . .” Nzambi sakumuna nge, mpangi ya kento.

¹⁶⁵ “Mu zola ntangu yayi kukwiza na Klisto, samu ba zenga yandi na masini ya Yandi. Kima na suka yayi me simba ntima ya munu. Ba me ningisa munu, kuna na kati ya munu. Ba me tula munu nyonso awa na bankadulu ya yinza, mvindu mpe potopoto na zulu ya ntoto me fika ve. . . me fika munu. Kasi Nsangu ya mbote, bubu yayi, me fika munu, mpe mu me telama mutindu ya kubwa na ntwala ya Nzambi, mpe mu zaba yawu. Mpe mu zola ti Nzambi kubaka munu mutindu ditadi, bubu yayi, mpe me zenga munu, mpe pesa munu funguna ya Mfumu Yesu mpe Mpeve-Santu, mpe tula munu na kati ya Kimfumu ya Yandi. Mu zola kuvwanda ya kufika ve bubu yayi. Mutindu mu kele ya kufika ve, mu zola kuvwanda ya kumona mpe kutula na kati ya Kimfumu ya Yandi.” Beno zola kutelemisa maboko ya beno na Yandi, ntete beto sambila samu na musumuki? Mbote mingi.

¹⁶⁶ Ya kele na maboko yiya to tanu yina me telama. Mu ke sambila samu na nge. Ntangu yayi beto kele ve, mu banza, mutindu ya kusala mbokolo na autel, mu banza kaka kana beno ke vingila kaka mwa ntangu fyoti. Mu ke. . . Na manima ya kusambila samu na bambevo, mu zola ti nge vwanda awa, mpe. Kasi mu ke sambila samu na beno ntangu yayi, ti Nzambi ke pesa kaka kima ya mutindu yankaka na beno na ntangu yayi.

¹⁶⁷ Tata ya beto ya Mazulu, ya kele ya kusonika na kati ya Ndinga ya Nge ya Santu, landila masonuku ya musoniki ya Nge, Santu Matthieu, kapu 5, nzila ya 24, “Yandi yina ke kuwa Banginga ya Munu, mpe ke kwikila na Yandi yina fidisaka Munu, kele na Luzingu ya mvula na mvula; ke kwiza ve na lufundusu, kasi me luta lufwa na Luzingu.”

¹⁶⁸ Beno kuwa muntu ya kukikulumusa mpe ya kulemba ya kisadi ya Nge, samu na mosi na mosi ya bayayi me telemisa maboko ya bawu. Nge tubaka, “Muntu mosi ve lenda kwisa kana Tata ya Munu me benda yandi ve.” Mpe Nge me benda, na suka yayi, mpe bawu me kuwa, mpe bawu me telemisa maboko ya bawu. “Lukwikilu ke kwizaka na nzila ya kuwa, mpe kuwa Ndinga.” Mpe mu ke tonda Nge samu na bawu bubu yayi. Mpe mu ke sambila ti Nge ke santisa konso mukwikidi. Mpe fulusa na Mpeve-Santu, bayina kele na bantima ya nzala, yina me basisa nionso na yinza, na suka yayi, mpe mu zolaka mona bawu

mutindu ditadi mosi na Kivinga ya Mfumu. Beto ke lomba yawu na Nkumbu ya Klisto. Amen.

¹⁶⁹ Beno ke na nsatu ya luswaswanu ve? Mpeve-Santu ke baka kaka ve Ndinga ya Nzambi mutindu bolosu ya kukombudila, mpe ke kombula bima ya yinza? Na yina beno ke kuwa ya malu-malu. Beto yimba nkunga yayi ya ntama ya nkembo, kaka mbala mosi dyaka, na nkembo ya Nzambi, ntangu yayi. “Ya kele na Yinto yina me fuluka na Menga, yina basikaka na misisa ya Emmanuel.” Nionso kintwadi ntangu yayi. Mbote mingi.

Ya kele na Yinto ya kufuluka na Menga,
Yina basikaka na misisa ya Emmanuel,
Mpe kana bansumuki kukota na yinto yina,
Ya ke zimbisa . . . mvindu nionso.
Ya ke zimbisa mvindu nionso,
Ya ke zimbisa mvindu nionso;
Mpe kana bansumuki kukota na yinto yina,
Ya ke zimbisa mvindu nionso.

¹⁷⁰ Mu ke yufula beno kima mosi kaka na ntangu yayi. Bantu yikwa ke kuwa ti masumu ya beno nionso kele na yisi ya Menga? Beno zola kaka kutelemisa diboko ya beno. “Mu ke kwikila ntangu yayi ti Nzambi me lemvokila munu, mpe mu—mu kele mwana ya Yandi.” Oh, la la!

Ntangu yayi, muyibi yina vwandaka kufwa,
yandi sepelaka na kumona
Yinto yina na kilumbu ya yandi.

Yandi vwanda kufwa. Yandi sepelaka na kumona Yinto na kati ya kilumbu ya yandi.

Munu yayi muntu ya mpamba, mutindu yandi,
Sukula masumu ya munu nyonso.

¹⁷¹ Na ntangu yina beto ke na kuyimba nzila yayi, mpe na manima beto me kuma na refrain, Mu zola beno kupesa mbote na muntu yina kele pene-pene ya beno. Beno tuba, “Nzambi sakumuna nge, mpangi-bakala ya Muklisto, mpangi-kento,” muntu nyonso yina ya kele. Ntangu yayi, beto yimba na Mfumu ntangu yayi. Ntete, beto—beto telemisa maboko ya beto, kana beto lenda, mpe beto yimba, “Muyibi yina ke kufwa,” ntangu yayi, na refrain, na manima beto pesa mbote.

Muyibi yina vwandaka kufwa sepelaka na
kumona,

Tata, beto ke sambila Nge ntangu yayi.

. . . Yinto na kilumbu ya yandi;
Mpe kuna ti munu, kuvwanda yimbi mutindu
yandi,
Sukula masumu ya munu nyonso.
Sukula masumu ya munu nyonso,
Sukula masumu ya munu nyonso;

Ntangu yayi beno kuzwa mosi yankaka na diboko.

Mpe kuna . . .

Sukula masumu ya munu nyonso.

¹⁷² Wapi mutindu beto kele na kiese bubu yayi, mutindu bakwikidi ya Baklisto, mutindu bisi-ntoto ya Kimfumu, ti Nzambi me sukula masumu ya beto nyonso, mpe me sala beto bivangu ya malu-malu kati na Klisto Yesu! Ntangu yayi, beno kele na kyese samu na Mfumu? Mbote mingi!

¹⁷³ Ntangu yayi beno bambuka moyo, bankundi, balukutakanu ke vutuka diaka awa na nkokila yayi. Nzambi sakumuna nge.

¹⁷⁴ Mu me baka fioti ntangu ya yinda, na suka yayi, ti mu zolaka kusala. Mu kuzwaka lukutakanu mosi na mabala mosi, na manima ya kisalu. Mpe mu ke kutana na bayankaka ya beno bankundi ya luzolo. Mu ke kukiyufula kana ya lendaka salama ti beto lendaka baka yawu tii na nkokila yayi, ntangu mu ke vutuka samu na balukutakanu na nkokila yayi. Samu ti, mu kaka . . . Mu banzaka ti mu ke vwanda na nzila ya kumi na mosi, mpe ntangu yayi beto kele. . . Bantu yikwa ba ke sambila samu na bawu? Beto tala maboko ya beno kumata, bisika nionso. Beto kele na bantu mingi ya nene samu na kusambila.

¹⁷⁵ Mpe mu tubaka na beno mutindu muntu ya Luther yina, kuna, sonikaka munu mukanda ya mutindu yina mpe fundisaka munu, mpe yandi tubaka, "Muntu yina longaka na bantu," yina mu salaka, "mpe lendaka tuba ti diabulu lendaka belusa ve," mpe nionso yina. Mpe mu pesaka yandi mvutu kaka na mutindu ya kusalasana mutindu mu zaba.

¹⁷⁶ Yandi sonikaka, mukanda, mpe tubaka, "Mu ke zola kukutana na nge na Lukutakanu ya Bantu ya Mumbungu."

¹⁷⁷ Mpe mu—mpe mu yufulaka Mpangi Moore kana yandi lendaka pesa yandi kisika mosi. Yandi tubaka, "Yinga."

¹⁷⁸ Bawu nataka munu kuna na seminaire ya ba-Luthérien, mpe yidikaka kuna madia ya midi, kisika balongoki nionso mpe milongi yayi vwandaka. Mpe yayi vwandaka doyen; yandi vwandaka pene-pene ya munu. Mpe beto vwandaka na madia ya midi kintwadi. Mpe bawu vwandaka bantu ya Allemagne. Mpe ba vwandaka na madia ya nene ya midi. Mpe bamama nionso vwandaka vingila beto, mpe nionso yina. Na manima madia ya midi lutaka, muntu yayi ya Luther, ya lukolo ya ba-Lutherien, telemaka mpe tubaka, "Mpangi Branham, mu me nata nge awa samu na lukanu mosi." Yandi tubaka, "Ya kele, beto zola kuzwa Nzambi na mbotika ya Mpeve-Santu." Mu talaka yandi; mu talaka Mpangi Moore. Mpe Mpangi Moore talaka munu. Yandi tubaka, "Mu me sawula nge, mpe lemvo kila munu." Yandi tubaka, "Mpangi Branham, nge kele ya kusungama, mpe mu me lomba nge na kulemvokila munu. Mpe ntangu yayi beto zola mbotika ya Mpeve-Santu." Yandi tubaka, "Beto me mona

bituba-tuba na zulu ya bakiti mingi mpe kupanza bima, kasi,” yandi tubaka, “beto zola Mpeve-Santu ya kieleka.”

179 Mu tubaka, “Nge ke kwikila?” Yandi tubaka...Mu tubaka, “Yinki kele seminere ya ba-Lutherien...Yinki kele denomination ya ba-Lutherien?”

180 Yandi tubaka, “Beto ke kipe ve yina denomination ya ba-Lutherien. Beto zola Klisto.”

181 Mpe Bob Schuler mpe bayankaka, nsoniki ya Christian Herald, mpe bayankaka, kuzwaka kaka Mpeve-Santu, nkundi ya luzolo na Billy mpe bawu nyonso. Bampangi yango kele na nsatu ya Mpeve-Santu. Mpe kuna mu tubaka... .

Yandi tubaka, “Ya kele samu na ba-Luthérien?”

Mu tubaka, “Ya kele samu, ‘Muntu nyonso yina ke zola, ti yandi kwiza.’”

Yandi tubaka, “Wapi mutindu beto lenda kuzwa Yawu?”

Mu tubaka, “Nge kele kieleka ya kusungama?”

182 Yandi tubaka, “Yinga, Mpangi Branham, na kati ya ntima ya beto.”

Mu tubaka, “Wapi mutindu samu na beno balongoki?”

183 Diboko nyonso kumataka, mpe masa ya meso vwandaka kulumuka na matama ya bawu. “Beto zola Yesu.”

184 Mu tubaka, “Beno vutula malonga ya beno. Beno baka ba-banc ya beno, beno kangamisa yawu kuna na kibaka.” Konso muntu salaka, na ziunga nyonso. Mu tubaka, “Ntangu yayi fukama mpe balula kizizi ya nge na kibaka, mpe banda na kulomba Nzambi samu na Mpeve-Santu.” Mpe mu vwandaka na Mpangi Moore samu na kutelama mpe kusambila. Mu kwendaka, mu tentikaka maboko na zulu ya mosi na mosi, mpe balongoki makumi sambwadi na zole, mpe compagée, kuzwaka mbotika ya Mpeve-Santu. Mpe ba ke na kuningisaka yinsi yina kuna, na bimangu mpe kusala ya Nzambi. Ba ke na balukutakanu ya kubeluka ya nzutu mpe nionso yina, seminere ya ba-Lutherien.

185 Oh, mu lendaka yimba na luzolo ya munu mosi! Samu na yinki? Ntangu beno kele na nzala mpe na mpwila!

186 Mwa kento yayi ya mputu, ya kulala awa, vwanda kufwa na cancer, ya kieleka yandi kele na nzala mpe mpwila, na suka yayi, samu Nzambi kubelusa yandi. Mpe ya kele na mingi ya beno ya kuvwanda kuna na mpasi ya ntima. Kieleka. Nge ke kufwa kaka, kana Nzambi me belusa nge ve. Ya kele na mingi yina kele na mpasi yankaka, yina kele yimbi mingi. Kasi, nkundi, kutala ve na ludedomo; beno lenda futa ve ludedomo. Beno tala ve na musiku, samu ti musiku lenda vwanda ve ya kuzitisa. Kasi, beno tala kaka na Yesu, samu ti Yandi kele Yandi Yina vulusaka beno.

Mpe, na nzila ya lukwikilu na Nkumbu ya Yandi, beno lenda beluka na suka yayi.

¹⁸⁷ Mpe kana Nzambi lendaka fidisa milongi makumi sambwadi ya ba-Lutherien—ya ba-Luthérien, samu na kulonga Nsangu ya mbote, na mbotika ya... na nzila ya kutentika maboko. Yesu tubaka, ntangu Yandi pesaka beto ba-refrain... Mutindu Winkelried, yandi tubaka, “Benoniwana na yina beto me kuzwa.” Benoniwana tala yina Yandi tubaka, “Bidimbu yayi ke landa bayina ke kwikila. Na Nkumbu ya Munu ba ke basisa bampeve ya yimbi, to bampeve ya yimbi. Ba ke tuba bandinga ya malu-malu. Mpe kana nyoka kutatika bawu, ya ke sala bawu yimbi ve. Ba ke tentika maboko na zulu ya bambevo, mpe ba ke beluka.”

¹⁸⁸ Mpe beno tala kuzenga ya nene, bisika nyonso na yinza ntangu yayi, Nsangu ya mbote ke na kulandilaka. Mpe bana ya Adam, yina bakaka lemvo ya Mfumu ya beto Yesu Klisto, ke pasula nzila ya bawu, mpe ke pasula nzila na nzila ya mbeni ntangu yayi. Mpe beto ke baka kaka mutindu beto lenda.

¹⁸⁹ Mpe mutindu beno kele na mavimpi ya mbote, na suka yayi, yina ke sepela na mavimpi ya mbote, beno bambuka moyo na bayayi na yina beto ke sambila samu na bawu.

¹⁹⁰ Mpe mu ke lomba ti bambevo kuvwanda na lweka *yayi*, awa na diboko ya munu ya kibakala. Mpe kana bakuluntu kukwiza mpe sadisa bawu, kana beno zola. Mpe mu ke lomba milongi ya Nsangu ya mbote, kana bawu ke telama awa, pene-pene, mpe ke sambila.

¹⁹¹ Na yina beno bika ve kana beno lenda sadisa yawu. Beto zola kulomba mbokolo yankaka na autel, kaka na mwa ntangu fyoti, kaka na ntangu beto lenda. Balukutakanu ke suka ve, na lukutakanu yayi ya kubeluka.

¹⁹² Ntangu yayi beno vwanda na lweka *yayi*. Mpe beto ke lomba na Mpangi Neville, mpangi ya beto ya luzolo ya bakala, kana yandi ke sala mutindu beto ke kabwana ntangu nionso. Kana bawu lenda... Nzambi sakumuna nge, mpangi ya kento. Yinki ya vwandaka? [Kisika ya mpamba na bande—Mu.]

Kwikila kaka, kwikila kaka,
Nionso ke salama, kwikila kaka;
Kwikila kaka...

¹⁹³ Benoniwana tala wapi nzila? Na Yesu. Badokotolo me lembana. Nyonso yankaka me lembana. Kasi, “Yayi kele Mwana ya Munu ya luzolo, beno kuwa Yandi.” Yinki Yandi tubaka? Yandi tubaka, “Benoniwana kuwa Yandi.” Yinki Yandi tubaka? Yinki Yandi tubaka?

Kwikila kaka,
Samu na yinki? “Nyonso lenda salama.”

Benoniwana na boma ve, mwa nkonga
ya mameme, kubanda kulunsi na Kiti ya
kimfumu,

Yandi kotaka . . . na luzingu, Yandi kwendaka
bawu mosi; (. . . ? . . .)
Yandi . . . ngolo na zulu ya ntoto, ngolo nyonso
ya Zulu,
Ba me pesa Yandi samu na mameme ya zola ya
Yandi.

¹⁹⁴ Ngolo nyonso, samu na kimbevo, bima nyonso, pesamaka na Yandi.

Kaka . . .

Beno kuwa Yandi. Beno kwikila kaka!

. . . kwikila kaka,
Bima nyonso . . .

¹⁹⁵ Ntangu musiku ke lembana, ntangu dokotolo ke lembana, ntangu bima nyonso ke lembana, yinki Yandi tubaka? Kwikila kaka. [Kisika ya mpamba na bande—Mu.]

¹⁹⁶ Bankama, mu banza. Bayankaka na kati ya bawu ke kwisa na bakiti ya bambevo. Mosi awa na zulu ya kipoyi, pene-pene ya lufwa.

¹⁹⁷ Badokotolo ya beno ya luzolo, mutindu babakala yina ke zengaka nzutu na bitini, anatomie, mpe ke tala mpe ke mona nyonso yina bawu lendaka, na luzabu ya bawu, bawu ke meka na kuvulusa luzingu, kasi bambala mingi bawu ke kondwaka.

¹⁹⁸ Beto kele na kyese mingi ti Dituti yayi ya nkembo yina vwandaka na zulu ya Yandi, tubaka, “Kasi yayi kele Mwana ya Munu ya luzolo.” Ntangu musiku kubwaka, mpe ludedomo zolaka salama, na yina Nzambi tubaka, “Beno kuwa Yandi.” Mpe yinki Yandi tubaka? “Bima nyonso ke salama kana beno lenda kwikila kaka.”

Sadisa kukondwa lukwikilu ya beto.

¹⁹⁹ Mpe mutindu milongi ya Nsangu ya mbote, beto ke kwenda ntangu yayi samu na kupakula bambevo, mpe samu na kutentika maboko na zulu ya bawu, mutindu bantu ya busantu ya tabernacle yayi ke vukana kintwadi na kisambu. Nzambi, sakumuna bangolo ya beto, mpe belusa bambevo, beto ke lomba na Nkumbu ya Yesu.

²⁰⁰ Na bayintu ya beto ya kukulumusa ntangu yayi na kisambu, mpe mutindu dibuundu ke yimbila *Kwikila Kaka*. Mpangi Neville ke pakula. Mu ke tentika maboko na zulu ya bambevo.

²⁰¹ Tata ya Mazulu ya luzolo, ya malu-malu na manima ya estrade, kisika mu me telama kati-kati ya lufwa mpe luzingu, kati-kati ya musumuki mpe Lufundusu, ke lakisa bawu nzila ya kutina, Mu ke tula yawu na manima ya bawu ntangu yayi mpe mu ke tentika maboko na zulu ya kento yayi ya kubela. Mpe mutindu bantu ya luzolo ke telama, ke tala yandi, kima mosi ve lenda sadisa ntangu yayi kasi Nge, mu ke tentika maboko na zulu ya yandi, mutindu Nge me tuma . . . 

56-0923 Lukumu Ya Bana Ya Kimpeve
Branham Tabernacle
Jeffersonville, Indiana U.S.A.

KIKONGO-KITUBA

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org